


詠懷堂詩

PL
2698
.J82
v.1



汝鏗仁兄先生惠存

乙未立春日
熊潤桐敬贈

一、

見

本

無想居士錄存

筆難

報徐屬奉

上

月

米

水

山

石

松

竹

梅

文鐵稍賦事是明史本傳其也唾罵久矣其詩新速可誦
此於嚴分宜趙文華兩集似而過之乃知小入無不多才也

芳絮溪微妙諸翁披具體儲年追蹤陶謝不以
人廢言吾當標為五百年作若兩辰驚聲散原

詠懷堂詩集

大鐵五言言詩以王孟意趣而直謝安
之精傑清詩叙不逮七言以次九言
論以代詩人如大鐵者妙矣潘岳字七
子不以人廢言也戊辰孟春大鐵

詠懷堂詩五言古布縱陶韋祗最勝此上
下二卷悉崇禎辛巳一歲作酬應七律特過半
而澹秀於鍊猶遜之前刻相伯仲但僅見之
本似似視前刻流傳尤少殆由賤其人或爲
中於未入國之新國屢有指斥犯時大禁購
藏者不無賈禍之懼耶 翼謀今竟從金
陵書肆得之而居之奇貨也假讀畢聊
爲題記辛酉八月陳三立



四詩皆集中所未載

塵土興于以合全隋其一孫
生鍾靈懷偶與一身抱萬機

隨何堪祇君生其苦辛宗
路去風捲白波宮天欲何

在積氣同歸 照燭自

真其四

石渠氏大藏



石渠所載大減

焦山海雲庵石刻之二

此碑東海焦山主僧大德
香：求復思、求復懷懷恒思光
氣廣義其世生經去少被法
朱華冒水松鞋乳暖七龍紅海
達半日暮暮曉暖若參主彩宗有
永碩白石諸勝街遂相臣月
鵲聚不為憂傷客

以齊江父通庵詩也嘉祥十太
東泰勝謚勒石謂此張祐集
金山之什身難狀父通為齊父士
維建安求嘉祐子之何意不與
在移筆較焉爭妍其詩景氣清
遠極適適上于法南祿曲雅有進
為不刻薛刻泰元僻置別殿偶
與給諫魚山熊公瞻摩碑下三後
謂此建康手錄一章中于桂木堂
之左廡同和崇宗古弘治于筆
花之元中中一轉解語雖在丰
雷華片、推碑便是父通皇南
玄象矣

崇祯戊寅六月八日

石學阮大誠識并書




石庵友仁道人即鹿野序也

訕懷堂詩



MAY 15 2001



詩序

余不佞從阮公集之遊也蓋自癸卯上公車始云屈指到今三十三年矣憶壬戌余官南雍公以給事侍養歸舟過江頭倉卒一晤別去遂十三年不相見人邇室遐悠悠我思病懶成癖能無各天之歎去年秋里中忽遭二百七十年所未有之變公眦裂髮豎義氣憤激欲滅此而後朝食捐橐助餉犯衝颺凌洪濤重趼奔走請兵討賊有申包胥大哭秦庭七日之風卒賴其謀殲醜固圉一時目擊其事者無不艷羨嗟歎以爲非此奇人奇才奇識安能於倉皇倥偬中決大計成大功哉余流落南中一見握手勞苦如平生居久之盡發其平日所著詩歌以就余印可余展讀之躍然曰公之技遂至此乎不見公久矣公猶昔人公詩非昔詩也公曰吾里居八年以來蕭然無一事惟日讀書作詩以此爲生活耳無刻不詩無日不詩如少時習應舉文字故態計頻年所得不下數千百

首然吾亦嘗思之矣不深其根不可以探微也不曆其變不可以窮態也不定其宗不可以摧魔也吾詩淵源於三百篇而沉酣於楚騷文選以陶王爲宗祖以沈宋爲法門而出入於高岑韋柳諸大家之間晝而誦暮而思舉古人之神情骨法反覆揣摩想像出入鍼心剗肝剗腸刻腎其餘中晚逮宋元以下及於近代之名人卑者熟爛如齊威秦皇之尸卽其錚錚者亦薰蕕互冒瑕瑜相參譬如羔裘而狐袖何足以語千尺之錦登作者之壇哉又曰古之君子不得志於今必有垂於後吾輩舍功名富貴外別無所以安頓此身烏用鬚眉男子爲也吾終不能混混汨汨與草木同朽腐矣余聞其言而悲之且壯其志之大識之高不爲塵俗勢利牽制埋沒也公少負磊落倜儻之才饒經世大略人人以公輔期之居掖垣謬謬有聲熱腸快口不作寒蟬囁態逡巡卿列行且柄用一與時忤便留神著述家世簪纓多藏書徧發讀之又性敏捷目

數行下一過不忘無論經史子集神仙佛道諸鴻章鉅簡即瑣談
雜誌方言小說詞曲傳奇無不薈聚而掇拾之聰明之所溢發筆
墨之所點染無不各極其妙學士家傳戶誦而全副精力尤注射
於五七字之間扶摘刻削吟或一字未安即經歷歲時必改竄深
穩乃已真有語不驚人死不休者即孟襄陽之眉毫盡落王摩詰
之走入醋甕其攻苦殆無以遠過以故其詩有莊麗者有澹雅者
有曠逸者有香豔者至其窮微極渺靈心慧舌或古人之所已到
或古人之所未有忽然出之手與筆化即公亦不知其所以至而
至焉公家堅之先生吾郡中推才子古人無兩亦心折公門下問
字者接踵輒曰盍往質吾家勳卿則知公所得深也吾竊有慨於
昔之持論者曰詩必窮而後工至以詩爲致窮之具而諱言之則
詩者僅一困人蹇士抒憤泄懣之物瑣尾齷宇無聊賴者之所爲
而古之人歌之樂章奏之郊廟陳之燕享何其道之尊而用之重

乎吾夫子身任在茲之文至舉而歸之天之未喪則文者物之華
天之寶也六丁爲之收拾太乙因而下觀繇來尙矣夫子五十而
知天命知之真故任之重也後世宗門相勘驗亦必曰近日有何
言句纔一動舌頭而成佛作祖不外乎是且天之厚夫人也將予
之以如夢如幻如泡如影之功名富貴爲厚乎抑成就之以千秋
萬世之大業照耀之以三辰九曜之光華爲厚乎不朽者文不晦
者心動天地感鬼神天壤間止此一物至今天下知有明允而不
知有文甫知有昌黎而不知有子昶八斗五車與三公九卿所得
孰多文章千古得失寸心前人之精神不息後代之心眼倍靈是
以古立言君子畏之慎之重之而不敢輕昔李百藥論詩上陳應
劉下述沈謝而王通不答薛收曰子之所言是夫子之所痛也則
詩亦難言之矣三代盛時無論公卿士大夫卽牧夫游女皆涵育
於先王之澤而湛濡於教化之深吐詞爲經矢口成訓何容揀擇

夫子晚而刪詩僅存十分之一所存少而所去多何耶聖人造化之筆世儒何能窺測其微旨而逸詩之傳於後者又皆可歌可詠可咀可味門弟子皆能習之而皆能言之則聖人之未嘗一概抹煞之也亦明矣而至今傳者寥寥或後人遺失或經秦火皆不可知而當時親受業於聖門者說詩又各各不同豈詩爲活物聖人固未嘗執一說以定人而人各以其意見自築一宮牆別開一門戶耶禪家有活句死句執其死句則此心自然非彼心一地不能知二地爲元微之之優杜劣李也可爲楊大年之以杜爲村夫子也可卽爲近日之呶呶王李輩也亦無不可得其活句則放開眼目恢廓胸襟永明不云乎衆生言語悉法界之所流外道經書盡諸佛之所說而況李杜元白蘇黃諸大家及近日王李鍾袁諸名士卽其中不能無利鈍何容輕置擬議於其間耶大顛一難昌黎杜口不讀佛書歐公晚悔勿謂床頭無捉刀人甚矣立言君子之

難也況乎宇宙之間止此精靈坡老爲鄴陽之轉劫留鄴是歲星
之現身相尅卽以相生千月元是一月何彼何此何去何從惟前
有毘陵晉江之爭雄故後有中原紫氣之犄角後來作者建風雅
之幟自命爲千古之人釵釧瓶盤鎔爲一器百川大海收之一滴
勿效金色頭陀妄擯神變之妙德只恐當來之佛尙迷如來之舍
利耳公詩刻成以余久交命余一言以弁其首癡鈍人作癡鈍語
以請教於公不知以爲然否

時

崇禎乙亥秋眷弟葉燦頓首拜題

詠懷堂集序

傳稱詩者志之所之也嗟嘆不足而歌詠生興觀不足而怨生聖賢以之達政易俗成功告神其矢志也諗諷性情以親媚於君父無物非志無之非怨怨斯善矣吾師石巢氏鍾衡廬潛霍湓蠡之氣而煥乎離處神光禧廟今上不諱之朝而丁乎蹇厖登歌清廟賡載肅邕而喁晰乎江潭蕩瀆之濱擊繭腫胝哭秦完宋沮鼎裘而顛連乎五噫之廡明乎王政之因革風俗之播遷鬼神之悲悼舖糟審矣離騷牢矣伯玉行年悔其少作采生平汗牛充棟不盈卷掬小子志之敷衽討論不污彝好觀海觀瀾牢籠衆妙吹明堂在鄒之醇割西園南皮之腴彈厭六代而砥柱乎柴桑其協律之什伯玉翕焉禪純摩詰聖焉禪智三唐無其匹也況下此者哉夫代有變而情不遷平心而鋪萬物之自然故讀者不勞而勸不遷止乎禮義也不勞而勸紐之王化也誦其詩知其人庶幾可以論

世

嶺南門人鄭露序

自敘

夫詩者教所存以情治情之物也情亦奚事治蓋身心與時物觸而詩生焉于是導以理義黜正其有未合者則人之所爲詩聖人教人之所爲詩也人生身世得失亦何多端而羣怨足概之誠能澣泳中和善所羣怨斯情治而人心世道亦罔不善罔不治唐虞卿雲八百康衢歷山之歌哀樂固殊然忠孝之則之至一也國風小雅尙矣謂離騷兼之者傷厥旨則然乃若其辭幾何不開賢知鬼神之漸乎降是而大風柏梁短歌公讌浩蕩雄麗震爍一時似取諸齊秦雞鳴板屋者居多駸駸喬煩惡能無慮即家步兵祇浮沉致諷耳賴陶公起而閑焉公睠懷典午恥拾宋粟托北門考槃以寓弁宛感其體植斯志深而興遠中和之脉所留豈其微耶齊梁淫極而傷亦隨之矣李唐君臣慨亡國之靡靡受音響以節制體雖至律而變然變亦至律而止變卽其所以爲功也與唐初情

法不諧參差拘窘未免互見至雲卿延清而嚴射洪而宕咸斐然
足觀惟桐川太祝達夫少伯盱眙新鄉六子爲能彌綸興象礚礚
性靈雖標負各殊品不盡副而于三百繇正趨變可以草怨之旨
服習含茹什一猶存不可謂非靈均陶阮之餘韻也餘輩兀兀然
疑相介違心推獎吾終未之能矣矯哉皋羽振金石于式微匪獨
趙宋希聲而置之太祝諸子間登降獻酬雍如也豈非感遇日促
離憂日以長怨而無失其人倫之正者哉嗟乎悠悠時代茫茫宙
合予出入揣摩于風雅逾三十年自審所獲理義與有獲于理義
之君子止此而大旨則括于以情治情之一言質先民俟後起舉
不易此矣

崇禎乙亥冬日石巢阮大鍼拜手撰

詠懷堂詩集

卷一


石巢阮大鍼集之著

南海鄺露公露較

四言

岳彼詩

爲詣潘木公不果而賦也



岳彼三山江海是藩分波若畎立表疑莖百谷宗之晝夜盍云彼
崇者阿亦豐斯殖藥露炎滋林芳寒特以迨川祗厥馴爾德君子
之有君子之寬令儀干岳澄思懷淵行芳氣潔式則幽蘭好述用
展秋棹烟飛曙霞汐月是見容輝未謂幾及風水乖違言及言歸
中心彌擣俯忤孚魚仰慚求鳥簞笠祁祁詎如綦綰班荆采綠約
在春祺敬此寒山松柏保之居諸以寸亦莫不思

雙星篇送史弱翁東歸

明河焉逝雙星在天纖月虛徐秋花如煙將子南翔載瞻烏鵲渙
爾方舟遐爾言謔湯湯江海欲厲何梁誰云牽牛可以服箱登高
望遠綴心長路古處敬哉罔或爾裕選芳攻瑜大業斯升暇豫吾
吾殆庶盍仍星漢不熄光照四表皇皇之求維予旣女

鳩嶺草堂酬方式谷肅之姚繩先見過

杲杲秋野亦載其陽天清氣豁墟井相望潦收植筍穫罷疏暢顧
我廩廚執畜多有務靜人閒寒山當牖婆娑其間可以飲酒羣龍
入谷潛躍欣同亦有不速鸞車雖離班荆蔣食力拯頽風田園顧
步寓目蕭散衍屐中林洩琴高館話言及醕以莫不善悠悠爾別
亦復何嘆留煙石戶注氣秋蘭晨夕見之延情愜歡

酬璩日卿山甫過平等蘭若

秋林肅肅夜靜以長窈窕月出空山雨霜心之憂矣是洄是翔爰
有同心軫余于獨開情若曙惠言如束耿耿伊何亦莫不告敬爾

飲酒齊爾話言悅管而幃吹簾及埧澣衷植義曷維其諼願言能
愔以御陰雨匪席匪石日月攸序百爾君子何莫古處

錢爾卓先生偕令嗣幼安幼光飲集園

悠悠時序既露以霜森標朝竦素烟夕翔離憂中來云胡不長琴
瑟在御寫此幽獨翩其谷音沛我弗速薄陳莞簞以話疇夙寒山
靜好高樹雞鳴嘉魚旨酒欸我平生豈無他士古處維朋臨觴不
樂日月彌晏停雲崇阿播芳南澗龍蟄匪存鳳衰何諫願整羽翮
相從敖遊攀霞懸圃摘月松舟任運之之盍舍盍求

田野

豹叔瑕仲較書遠塾晤言成阻秋野屏居觸情宵旦難已
於懷

肅肅田野矯矯脩林暘雨夜滌山氣朝深婆娑一室有觴有琴弄
琴啣觴爰寫我心田野肅肅脩林矯矯村靜鳴雞天長歸鳥明月

宵盈軒墀淨皎偶影其間羣象載悄迢迢星宇夜境其幽蟲聲嘒嘒若或相求園列靜峙雜籟交流我思君子饑飭曷酬良夜有燦良辰有撰霞冠鮮姿颺迴餘善與子遊般期固或倦豈無他人懷我親串

黃鵠篇爲潘次魯南征賦

清秋吳會白雲戾天層城標霞空江如烟黃鵠何儀於彼皇澤睨爾蟠螭肅爾羽翮月連修坂露被平臯將子翔泳我心怵怵怵怵如何琴瑟用寫子當騫騰去余中野野有其綠亦采其萍出處敬哉以莫不臻

雍之水四章章八句爲方司成書田賦

雍之水鐘臯流之洪源湯湯溯洄求之求之無射罔其有懌下上蟲飛永言來格

雍之水鐘臯衍之於錡於釜左右選之抑抑君子敬其箚笙饗之

聽之中和以升

雍有水釜則尸之於昭在廟皇人私之陟降有桷盼蠻有若馨之聞矣載襄其瘼

民之勞止暨我西京皇皇多士誓救於寧伐柯如何心誠儀之景福爾介亦莫爾思

樂府

聖人出

聖人出乘青玄金支庶旄纁哉紛高山大海告美人以心美人遊敖下上罔極嘉夜都良何所德筮甘屋懸悱惻美人哉

君馬黃

君馬黃馬黃將安逐九河湯湯日月出沒秋龍駢離自南北駕車馳馬美人亦何極如蔡如易乎悲矣

赤鳥飛

羣社期於追古故各擬古一章余拈適得朱鷺因憶饒歌
之義俞徵君安期辨攷之殊詳而愜易朱鷺以赤鳥飛者
誠是也余曾載之詩印故賦赤鳥飛以首簡

鷺飛彼烏鳥飛何以赤鷺輝王舟祥爾赫百靈儀之亦胡射陳寶
雞安鳴茄下之鷺鷥焉食飛土逐肉以彈九雌畢日重輪光四極
聖人萬年天無斁簡兮之臣二千石

獨漉篇

獨漉獨漉水深泥濁止邪心則苦縶絆弩淦何所舞東方未明車
班班姪女而冠工數錢枯魚連索飛上天天色朝蒼蒼暮雨丞
卿盱視當鼓前跼蹐小兒不得語

猛虎行

虹下垂梁之甫蟠谿頰虺怒如虎噴礪天狼驕水弩行暉黯黯不
可指孰可犯冠莫匪蟬綏莫匪范扶桑不旦慨在余東海男子長

欵欵芳樹豈不蠹黃雀將安居乃公食採丹木實峯陽笑語閒啞啞

烏啼曲

風從闔闔吹滿路浮雲陰言逆我馬載披我襟行人忽忽難爲心
瞻彼相烏爾復何爲長太息東西南北俯予罔所極我無爽德忍
馮丹朱流丸伊止弗過甌臾霍納都梁氣何綺荆棘翳如將焉徙
鳳兮鳳分吾其已

雉子班

狸膏匪食翰音用以塗芥爲胄金爲殳斯距斯羽錦臆敷觀者何
爲不闐闐雉子飛飛莫與格集於陵岑飲於山澤黃鵠下來朝且
夕勞利勞利雀啄強頽舍老人泥空倉北風漠漠綿雨雪有時四
野天昏黃

升天行

朝榮亦可悅短世亦可嬉高陵日有仰松柏將安爲縱體排崑崙
仙人子爲誰雲日蕩精魄芝菌禦我饑此事不可要終爲黃壤欺
窈窕春風開秋月還因之畢情向一觴但醉勿復辭辭之餌丹砂
行行踣高霞

河漢吟

坐久望河漢高高安可窮草露氣象交柯條貫微風徘徊於此間
喟嘆從中起仙人不可希遷化誰當已惟須飲美酒坐使臆容澤
被服紈與裘放遊肆娛悅林深夜以靜鹿鳴何呦呦離羣而索居
在野空相求同心有佳人遺世稱窈窕皎如雲間月臭若三春草
我無鴻雁翮枉用懷奮飛相思彈玉琴終夜流清徽迢迢河鼓星
靈會繇來晚寄言天上人努力進牛飯

淮南詞

青青河畔柳搖蕩獨何心流烟向芳草吐葉與春禽

淮水搖空綠艸色欲誰際情隨極目來旋與風香逝
青絲絡玉壺十千何足道小立壚邊人拘得花枝好
雜英繞春甸杜若吹還香香多不解憐爲憐采路長
樓頭玉手垂立馬嬌不發少婦逢健兒目成若相齟
花底捉迷藏燈前擒社虎非止媚心情大可持門戶
小婦進屈卮冰盤勤阿姊歌舞滿名倡不解誰作使
衽服鳴金鞭馳射春風中彎弧貫雙兔廻手接歸鴻
誰言估客愁歌吹徹清曉雙向曙窓眠歡聞烏白鳥
一擲紫騮馬再擲珊瑚樹男兒好作健意氣堪誰負
參星夕以中杏花開復落曠野無牛羊渚田立閒鶴
春湖水艸闊疎星動魚罾撈蝦拌舖藥漁苗稅何有

子夜歌

曙花能有情紛紛布苔隙爲憐歡去心一覆歡來跡

銀箭滴金壺漏水無心轉遲歡苦刻長歡來刻何短
持歡比春風歡聞薄作哂吹衣徒婀娜吹心那可忍
回頭歡忽至虛徐如非烟詰歡見何許見儂理行纏

詠懷堂詩集

卷二

石巢阮大鍼集之著

南海鄭露公露較

五言古

同白瑕仲石塘湖上行卽望其所居

村煖杏花久門香湖艸初吾愛數來此于君定何如君言樽中酒
斟酌長不疎陶然臥山窗松風開我書

春日園居程搏仲錢豹叔衡之兄前之弟夜集

春風解沉冥霽心難與昧騁望感有餘靜審意彌會林暄香詎弱
禽適語方泰同心既偕集清論亦旋浦杯旨泛寥廓燈英播芳靄
淹坐遂忘疲孤鐘肅靈籟敬此良夜娛達生理無外

初春顏若齡自山中來邀吳幼玉社長天都山人戴德充觴

咏

春雲能有情流英照園圃二子行藥來相延散林步遂令曲徑蘿
挂彼高峯霧剡谿發遺興延陵洞音數天運誠悠悠達生貴能樹
礪礪意有得沉冥理非誤初葉一禽嚙輕颺數花驚唧觴此何云
籬山青已瘖

春夕雷雨大作曉霽枕上口占呈茲園大人

春宵盛雷雨林臥憺忘喧嗜焉形神交塵慮安得援踵息未易固
山夢猶然繁所歷舉非故殊別桃花源整策追孤霞秋烟開一村
藥香旣連曉蘆葉時隱門轉步達清溪溪古趣彌敦聊就苔泉濯
復聆松風翻山月宛能來照見石上樽不速二三老依依道寒溫
覺頃已聞鐘未畢漁樵言展轉遂亭午白日麗前軒起循池上步
池水閒心魂綠光若微演岸艸增春痕花葉沐以齊晴鳥紛我園
竚立始有悟任運良可尊逝者固如斯轉盼何足論明晦復何餘

寤寐無一存願言禮松喬宵守天地根

春霽聞若齡將入豹嶺咏此訂次月偕幼玉往遊

春山紛睇笑列景給遊衍嘉子獨往意恬然謝矜勉及時課耕種
餘力肆諷撰穆穆秉弘尙趣伸跡彌卷余方守塵巷庭圃溺微善
所未辟梁穀志氣何繇展候至鵲庚鳴村深杏花暖此當追高煙
良話詎令簡

春初述懷寄方無念首聯卽雪際得無念書夢中句也

積雪照巖戶讀君寒歲書倏忽節遂更梅閒羅我居未蝶香已展
將鶯葉方初游氛冒澤霧苔沫激晴渠情生固有勞候盡安所餘
斟酌春風中我懷益以愚雨至謹山約田園念當鋤此事治便已
不復思畋漁悠悠此窮年焉知盈與虛八公秀春雲鷄犬無敢嬉
云有無念子天花漾精廬平等山色在靈異鐘音殊廣月被江淮
千里流瀟疎向茲印遙心同異將焉如

看杏花宿瑕仲山館微雨

鷄鳴杏花中識君深隱處山青與托隣
艸碧自成路炊煙亦何閒
小酌就花樹辨葉斂傍眺因香縱恬步
湖風弄微寒果兆夜來雨
蕭蕭春竹鳴高館更成趣移燈詣山窗
茲遊吾已屢留興及三秋
天香飲華露

仲春過訪方仁植同年廬居因游南浮有懷野同先生

春艸羅鮮雲朝暮表空翠嘉遁於焉托
靈貺傳聞異來此屆芳月
入林踵香意伊人抱先疇白華自躬被
仁智秉遺則艸木衍閒侍
時聞歸鶴響莫制羣魚淚盼柯意長餘
襄芳旨兼備閒情向前浦
浦暄綠已遂渚嘯乍開合篠石互爭避
想見花蒲時琴樽各臻媚
濯纓感洪源高山獻長嘯

與左又錞飲花下

與君酌未已花葉旋成故此理定何違
小飲爛有悟所慮芳樽空

斟酌難爲趣臨水悅空影因風察香路愴然賦新詩盡此林山暮
程盡臣以天都遊記見示賦此

天都萬古峰從君標腕相結撰聊見心高深甚殊狀旨定星潭瑩
興展風榛壯石髮吐華月藥芳蔽雲養余方畫荒籬耳目謝靈貺
遵烟憐鳥凡縱沼哂魚妄三復刷胸顏奉情入霞上警蘿若開笑
追香宛迷杖道存靡迭趣意至有餘况喧鶩屏塵慮端嘿營游尙
兀然吐長謠清絃禮禽向

盡臣擬爲余刻詩述懷以謝

晏息向竹房耳目愴無侮林花覺我閒紛紛下庭戶
齊心與定氣馮之酌終古自昔邈何獲在我恬有取人謀實未饒
叔季矧多扈宙合府一雲朝昏瀉千雨正則固何云微言孰辭怒
彌天蟲豸知至矣荆榛堵願言謝枯槁山巒漑寒圃蓮社無畱煙
濮田洞遺矩潭心靜月開峯首孤雲舞刁刁警鵬風智力將焉賈

憶李煙客林六長寓天寧寺

蘿雨靜可數閭巷如空山念君蕭寺中焚香終日閒聞鐘結旅夢
攬鏡咨塵顏野水濯青菰罕魚何以殮晦色不連暮素月光可攀
齊心托孤琴爲君開潺湲

雨中喜羣賢集十資閣會文

榮木給靈雨衆綠交有聲斟酌一氣中可以知文情拳勺屑海嶽
爰象排空明艸木負本性日月有飛英感之不令持孰謂非我誠
雲龍滿虛谷咏賞難爲名花葉春煙和石瀨秋泉清長謠達松風
茲賚何可輕

吸江樓爲林六長遙賦

余昔涉閩江孤舟涼夜永深煙閉蘿葛疎星墮簪簪去此垂廿年
迴思神魄警之子彼土秀結廬攝清景雲嵐入吐納風泉交脉聽
春汲山鬼俱睨笑文魚領陶公亦有言夫我愛其靜何復事遠遊

苔花蔽寒井鍾阜看孤雲鄉夢誰能屏夢中江月斜閒猿叫秋嶺
送吳元起應試白下

弱齡貴意氣吐吸青雲端與君先子交味比清秋蘭中路忽捐背
喟焉悽心肝柳宅既寥落稊疇亦摧殘三子讀其書菁菁如琅玕
仲復邁儼伋汗邪匪所干旦夕乘雲浮此豈才者難一釋藜與藿
再被綺與紈何以奮平生而酌岷嶺冠高枝饒疾風陸海多狂瀾
還期善翱翔無臻弋者歡舟楫在江臯抱琴向子彈曷之敬言話
申以長加殫帆張曲未終東去如飛翰

泊青谿柬銅陵崔明府

秋江閒可涉露盛香未已枉渚旣蹇目繁葦亦因沚沿波弄逸棹
采采向誰是循藻審魚樂聞歌簪纓理青山列遙岸月下絃聲起
屣逝琴且荒重觀茲邦美江村植豐菊山厖刈餘黍服義絕訟萌
歸仁集遐趾令譽崇笙簧嘉言備芳醴何藉龐參軍從君自茲始

泊采石遲郭侍郎金谿不至感憶

孤舫倚山翠木葉靜可數微風入清夜海月漸遙舉佳人隱秋花
琴樽暱何許幽禽響高樹恬魚擊寒渚所得良自然異患復何侮
開烟無弱帆蹈藥見貞履懷哉終古人智仁洵有取

再同周公穆張損之劉爾敬崑玉家衡之兄登采石山寺廣
濟閣

客次理清娛懷情赴霞上耳目馮象泯雲天盡簷向空翠感微息
定覽簷殊狀葉並遠帆驚鳥習天花漾山樽給永日清言副靈貺
信美土非邈沉冥旨何妄礚礚遂忘暝江烟響歸唱夢覺聞秋猿
孤舟若青嶂

九日霽後同李煙客梁非馨朱白石汪遺民吳栗仲田衛公
何不承方聖羽王禹開方爾止密之集李玄素通侯松筠
閣共用遠字

幕府秉冲規佳辰集瑤琬俗名豈虛愛正冠事遐綬清論紹涼雨
森林若危巘羣益旣延逕陳芳亦充晡遂使短襦人不復顧牛飯
貫月矚高戟遵霞踐華幘洵知絲竹妄力策盤匱蹇孤蟲吐深花
閒魚擊澄堰向夜埋幽桐清商爲君遠

謝吳明府闇生餉菊舟中

陶令盍云邁高風長在茲清尙君更遠蕭然客江湄旅舍罕炊煙
盡室良苦饑念我滯孤舟恬以香露遺密葉旣垂盍繁英亦啣枝
秋雲映水窗青山對支頤閒寂自可樂搖落誠何悲因嫌籬圃間
雞犬還我追

喜李煙客同舟往眺三山因柬潘木公

孤懷對江峰支頤憺忘語陰霞乍興沒風葉落無禦葭莢極遐矚
鳥歸識何處廣除吐遙月意爲情人舉水白導魚路烟青飲鴻渚
欣子期適來開琴展良緒嶺嶺即悽葉海樹若吟嶼曲罷江轉青

秋花列楚楚三山整烟磴中清湛芳醕勝情余既饒尙禽矧多侶
阻風望燕子磯不得往同烟客爾敬公穆孺韜慧玉損之賦
海氣感川薄涼風獻焉起孤舟寄若鷺羣籟亂于兩客心彌以恬
吟賞自茲始奇嶼點空碧風濤限遑止遙葉響清猿清漪閣殘芷
眺聽與誰格論譔亦咸旨物遣悟觴聖神和兆琴美悠哉懷昔賢
達生復何理

柬姜儀真如農

秋峰立何遠清吹起寒木空碧豈限慮澄瀛載延目琴聲沸江路
孤舟念明牧譽並之杲峻澤向東溟縮潔性見麾魚仁心傳抱犢
場馨禾黍盛人豐桑棗熟古堰無殘筍遙烟靚平屋萊蕪詎虛儗
單父愜私淑江淮此襟邑安危若旋轂蒲璧籍嘉猷用介邦民福
擊汰滄浪千纓歌爲三復

送吳孝廉修能北上

峨峨天子都雲端表空翠日月瀑源湧雷雨中峰肆紫芝摘還長
玄猿嘯殊異君家代居此窮年探靈閼隱几閱候變徒藥謦泉白
玉女攬花笑霄鶴窺烟至壁坼青霞開琅琅辨仙字勝情若未鑒
江天跡遐寄川氣映簾動水花切窗侍雪響廣陵濤香裊竹西吹
眺聽意何適智仁理咸備抱膝吟已深肝衡志當遂河暄冰未兆
堤秋柳仍媚霽日照洪波征帆若雲驥諷諫追羽獵訐謨策安治
金門視瑤臺大隱旨非二及春整遊鑣宮鶯爲君醉

喜孟元白見訪因坐湛閣論詩

孤舟聞吹葉客感彌以繁臥起入星露雜籟連朝昏靜者復奚自
遙琴開我魂山翠襟下吐妙香亦敷論家云鄰漣湖中歲遊夷門
嵩雲覆旅夢芳畹綿鄉園所挾豈區區自哂無一存秋潭演寒碧
靜浴三山根視聽此交愚天海將何言與子露危願敬此終日樽
齋心禮川嶽望古懷所尊陰霞斂浮渚圓月逗層軒惻惻念蘆中

野雀安可喧

已戒三山帆風逆還泊鑾江招杜退思入舟觴咏

三山舉予情逸棹已晨理風水哂迴互還摘荒洲芷微月吐遙岸
空外飛鴻止雙樹流湘煙旅情念吾子明燈黃葉下寄夢疎鐘裏
霜篠惑深夕涼吹渺然起伐魚就沙埠菊逝酒仍美孤舟自可尋
琴聲汎星水

迴舟風日甚美與諸君子飲酒賦詩都忘客感矣

方舟肆游衍靜見寒江心霽景旣浮嶼孤烟亦懷林良飈勝波來
悠悠感我襟諸子具瓊枝話言若開琴遂永舟次酌閒矚川上岑
葭莢乍虧蔽鷗鷺時飛吟爲適無復餘懷古何必深

絲天開巖歷諸勝登攝山頂還宿恒覺方丈

石路淨無塵昨夜况微雨氣與山雲霽響悅松禽膺勝具固所尅
澹慮饒有取礪喧芳詎歇巾晦翠恒普旣就廣蘿蔭亦漱寒泉乳

此興各未夷更爲高峰賈懷音達鐘界飲光坐霞廡烟定羣峰開
林缺江帆舞遂覺性情逸彌惻塵襟苦無言儔法王諸天盍予侮
歸彈石上琴月華應絃吐

攝山東峰石上坐月

竹路亦何白涼月燦東嶺客心感佳夕遊咏孰能屏危步歷禽上
清言滿松聽泉幽滴春脉林貞抱秋影澄鮮入何際空明轉遺境
微風拂露花石上苔彌淨身心化寒碧沉冥不知省賴聞霜下鐘
山蘿動微警

宿方大方山館

塵居苦物役諾向青山必霞外詎有方區中誓當紉遂禮孤峰雲
便造幽人室花藥性所殷詩書道終吉裁裳濫碧蘿註經寶丹漆
堦前虎跡馴石際羊聲叱靜夜無端倪高論恣回瀟豈徒暫遊衍
托志于焉畢清境未可淹又共山雲出廻眎笑言中人與翠微一

采蓮曲江微雨晚霽同茲園大人長子叔前之弟泊諸詞客
賦

嘉會屬羣彥撰酌非所任將肆塵外遊以夷終古心肅舫泛江浦
浦曲花路深枉渚衆香鶯垂景廣霞沉采采畏花疎靜意誰能淫
微雨川上來忽忽滋重襟萬象斂霽夕圓月逗孤岑文魚負我舟
蘭芷充我簪宓妃顧我嘻馮夷鼓且斟釋此不臻懽晚晚將來侵
沉冥豈絕躅高陽遵故林擊汰弄澄鮮廻芳怡所欽昔賢何爲哉
喟然涉江吟

送宋鍾南計部歸楚

秋蘭行作花君歸理荒畹孤舟去若翔青山夢俱遠余同獲落情
跡向滄洲偃截潦安魚梁迎晨進牛飯狂歌入谷深還情自厓返
何以肆娛悅高雲閣危巘鬱鬱澗底松柯條畢淹蹇貞此霜雪姿
聊當卻晚晚青陽自代除東園謝芳婉

答吳太史天石見訊并訂天都之遊

遙望天都峰峰高雲木秀嵐翠終古凝芝英四時茂寶鼎煉金光
神臯泄所守余友謝塵纓逸駕茲焉逗遺身翺鶴路結廬抗霞首
近遠風中泉朝暮簷間岫曆遯羲和則藥補神農漏厨粃賤椒蘭
山香貞橘柚遐念蘆中人音旨各相繆江氓亦何營固窮守耕耨
飯牛遵若時分蜂謹其候採薪樂有員緯蕭則安陋誰甘負鼎譏
濡彼在梁味枯樹復誰感問天理常謬秋山蓄烟霜褰裳誓相就
從君折瓊枝雲車以先後睇笑逼真靈行藏擾華宿雲梯檜枯扶
山響林筵奏媚月整清絃欣泉理閒漱返景懸圃來若華穎初晝
松喬既可要瑤象亦紛筵高斟北斗漿一奉軒皇壽

讀顏若齡種秫齋詩即贈

若齡玄對人霞上結修軌道開巖壑昌跡謝簪纓滓其身卽貞松
清飈言下是詩書肆愉悅意至亦秉耜任運趣彌超觀生吉所止

秋嶺綿鮮雲春湖散芳芷開樽吐長謠思君應若爾

秋夜宿白瑕仲山館

涼風動庭樹離居軫宵旦采萸此何時寥芳畢遐眷吾友考槃人
衡門若河漢象緯關睇笑艸木感冲積湖光澄遠心峯霞陰華撰
歡余孳結情輟經事游衍剝棗就荒籬登魚理芳醺詎違餽緘常
一謝簪纓患露下秋蟲鳴閒宵閣吹萬寄夢向山窗身心竊餘善

方爾止見訪感舊

蘭蒨三十年與君先子好峻義千青雲英詞摺芳艸屢獻北闕書
歸種南山稻次第謁承明雲龍感天造詰人萎昭世予亦墮輿阜
音塵若在夢江海歎長浩之子美何度英立洵國寶身固瓊華枝
氣則江山藻好我終古心示以周行道翔益下蓬藿疏榮與梨棗
黃虞事敏求蟲魚亦深討宛在皋蘭居故人述遐抱亭亭秋月閒
瀼瀼露花皓清醕陳枯魚鼓鐘爲君考日月收羣星谷王備行潦

勉矣庶殆隣鼎實誓相保

方肅之自天都還畫谿以書見訊賦答

危坐若垂釣此語夙所美涼雨秋燈中顧影居然是獨持寒竹心
靜審啼蟲旨劃然天都雲廣蔭而遐峙鮮意感枯夢高情破荒視
于焉獲我性亦既見吾子陶陶永一樽長謠報芳芷遂覺尺素煩
加餐托雙鯉

秋夕遲友人不至

塵居忍違俗蒙慮如荒萊安得弄秋霞濯濯曾顏開懿此籬下花
幽香亂我酷啣觴復鳴琴高興誰能裁剝啄蟲聲間僮穉諳無猜
此情正可同梁月爲君迴

秋夕同若齡公穆衡之兄前之弟集正之弟水亭月下

人閒豁幽興月色亦更新欣無外事牽易我樽中醇衆艸悅柔露
蟲響羣來陳繁柯斂倦鳥水霧升恬鱗此夕夫何如不樂思誰因

達侶各能齊古歡斯偕臻觴咏甚有得陶陶嘯天民千古奚逝哉
而珍豁間綸

再同若齡集正之水亭遲幼玉不至

秋風吹野心曠然覽川陸澄波涵夕陰返景耀深谷島下輕霞鷺
觴處孤花肅佳人期未來碧雲隱修竹蘿篠各自媚琴樽意俱穆
賴此林月佳延輝破幽獨

落潘木公

遙月江上來見子顏色好林外立秋峰是亦余懷抱同心而離居
相安異何道徑絕風雲通壹志于文藻朝華匪所居榮木感將老
茲文幸不渝微軀誓相保霜中鴻雁飛江海思彌浩流聲東去雲
鼓鐘爲遐考蓄此杲杲心三山摘春艸

答錢密緯

撫此籬下酌芳意晚而靜陶然遂移夕素月抱高嶺虛寂迫遐思

空明閱眞境佳人隔江臯菰蒲澹秋影情來華露滋語際霜星耿
余方偃舊厓齋心漱苔井曲阿春烟翔旅翮爲君整

秋山霽夕同胡衷朴白瑕仲方聖則月下酌感賦

懷情欲誰喻眎此中林月霜空氛以清山霽輝如發園列肅澄景
蘿篠響寒汲故人二三子共我照華髮啣觴百感盈開琴素襟洽
靜體卽巒岑浩論失溟渤悠悠尋古歡食此蓬蒿力兕虎復何之
鳳圖久蕪沒愼此露中行秋野媚陳巖

鳩嶺遲潘次魯不至

山雲靜吐輝流英照中野持情復何向偃曝秋扉下穫餘禾稊繁
可以瞻罇罍開逕欸親益漁樵亦來社獨有同心人煙霜格車馬
鳴雀定不喧菊香澹盈把使我對寒月孤琴爲君寫

山堂初度呈朱岫翁夫子

本無偕俗姿初服乃成適林肅以徵秋月廣是知夕達生何必觀

擔忘覽揆夕籬花表孤英露葵給寒摘動植具有會語嘿各來益
區區哂昔人悲涼撰頭責

從鳩嶺至龍山赴宗白上人平等蘭若晤言之約

野性亦何獲林外前山影寒煙營鳥路排虛達獵嶺同心二三子
先期候蘿逕巖扉悵獨寤風泉羨孤聽舒趣雲霞末洗心鐘梵永
既肆招隱情彌引高丘領使我慰離居閒琴爲君整

山居懷汪以玉

摘葉臥荒煙心神自修特霽景抱榮木暘聲響餘穉遙憶同心人
江雲事閒即逍遙吐鳳歌沉冥勗龍德先民道未汙敦悅力所克
佩蠶蘭蕙芬室捲蓬蒿色豈徒恬寤寐方將瞻鱗翼華鯨狎海情
怒鵬負風力秋駕亦云然於君復誰抑

寄懷王徵君化卿註易桐中期以春晤

野懷澹無向高矚肆霞外窈窕寒山色遠近風榛籟任運跡彌伸

招隱思俱泰貞吉慕伊人龍眠臥蒼靄冲意眷泉石忍力謝喧繪
陋注中古書洞啓先民昧白首猶聚螢紫芝取充糲山空夜雨霜
耿耿星辰大整襪拾谿步廻艫擊寒汰石路悵停策春洲乘當沛
女蘿曳煙裳巖琴寫幽慨蓄此芳蘭心逍遙撰良會

冬旭偶過若齡江亭幼玉烈卿紫瀾亦至觴咏終日欣賦斯
作

景氣含蕭遠遐心念川陸役形一室間彌歎塵襟蹙伊人秉奇懷
高館抗霞服江廣日華驚烟盡峰情肅興至忍自岐相從解憂獨
羣賢各有會歡言理邁軸秋蘭串芳咏荒洲攝恬目閱帆思無倪
審釣理恒淑所未窮夕佳遙鐘限城隩素雪當寒翔抱琴誓來宿
從石門湖汎舟至百子山別業同璩山甫顏若齡賦

山澤招予情蕭晨肆無歇叩友有同戒扁舟旦超忽趣與遐峰眷
棹向朝曦撥閒漁響各臻喧鳬意逾伐初至惑雲壁轉步辨墟樾

循葉懼谿盡標烟識林闕傾壺欄竹下述興高陽末延賞輒迷端
清論詎宜訥出谷值歸鳥還臚演華月枉渚彈廻互陰霞覩興沒
共此寒歲歡吾生悟恒達

寄曹元甫

屏居向田野異境誰能干耳目罕安營志意亦以安置酒發浩歌
追我平生歡遵養嘉若人靜體如秋蘭殖芳露晚中栖興天雲端
夢外理幽樂曠處辭塵竿北風晨夕來江海稜稜寒願保貞松姿
爲加白石浪芳艸釋春冰旅翮烟洲寬誓將戒方舟從君相遊盤

郊居窗中同程搏仲錢豹叔觀道上行人

上室納朝暉理恆意逾肆偶影步簷外川原入寒眎悠悠古道塵
車馬共紛媚中夜已云然日入猶未旣役形霜露中豈不感劬瘁
世路固有營馮生亦殊智余情彌未閒汲汲理幽事種藥懼晚荒
採薪恥林樾魚梁軫其頽雞埒傲當治烟深禽甚聒蘿淺月難遽

樽香寂何聞對君起長喟

雪中陳潛山蝶菴見枉賦答

峨眉饒古雪積素通萬里高從天柱颺光照中江水衆象旣以輝
纖塵復何滓迎暄弄華色蓄澗流春雨陳侯天壤英爲政亦如此
余方息微躬霜疇守寒耜高軒聞見過榛萊蔚焉起一感羅雀心
爭鳴若臻喜何時侍清絃寓目春風美更濯吳塘纓長歌醉香芷
早春懷計無否張損之

東風善羣物候至理無違艸木競故榮鴻雁懷長飛二子歲寒偉
睇笑屢因依殊察天運乖靡疑吾道非鑿冰弄還櫟春臯誓來歸
茲晨當首途遙遙念容輝園鳥音初開籬山青且微山烟日以和
及時應采薇古人無復延古意誰能希

送王方伯梅和督運行便道觀省

擊汰向春江江煙漾簪簪句色衍芳意纓歌感遐聽閒眺白雲上

晴雪冠高嶺爲政于此間俛仰亦何靜山花蒙鳥路軒琴達猿境
護綰屈行役征帆念當整靡鹽洵所尅後樂誰能屏弭節展潘輿
南薰日初永親好亦來過陶然彈觴咏田龍俟利澤練馬曳清影
誓當及秋期雲旌建華省廣霞陰石戶遙泉濡苔井重慰山阿氓
臄臘炊煙冷

同聖羽元起價人五一四蘇不迷肅應慧玉損之集園觴咏
林煙日以和衆鳥天機鳴澤氣若蠕動瘁物亦懷榮觀化有殊候
給賞無孤英恬居巖戶間野酌時自傾青蘿乍開合羣益爲我盈
良話擬春風悠然述平生情至趣仍默理達物逾輕無言指芳草
日夕靜自萌風榛空外流山翠籬端明願言共閒觴釋此何復營

園居詩 有引

偶影空園欣慨交集感此榮木冉冉懼老遂招同好勵意
長往已念南陔斯在而谿刻自處殊乖昔賢任運之旨復

賦此詩標舉興尚敦告朋疇焉

息影入春烟形釋神亦愉外夢疇能干此境漸以愚偃坦遂交旦
林禽聲已俱感此耳目目前理勝未可渝樂志豈在多遠游將恐拘
僮穉覘我興薄陳湫與舖舉此就簷暄聊用曝我軀

臥起春風中百情咸有觸偶立聞空香緩步歷潛綠蟲豸亦懷暄
云動狗所欲余方守故情女蘿咏巖曲時復釋道書高亭事遙矚
悠然江上峯無心入恬目誰能忍此懷弗爲羣賢告

述懷

春風蕩繁圃孰物能自持人居形氣中何得不因之情逐舞花亂
唵隨鳴鳥滋循此遂百年我心誠傷悲希古良有獲元化亦可窺
試策追高霞濯影清江湄曳曳空山蘿豈不寒與饑聊用違所伐
亦自拯其卑率此孤雲心悅是貞松姿世人或相笑余情終不移
花鳥及時羣方春爭一候景氣良有諧靜默爲守車馬驚芳月

琴瑟展清畫意至境無餘所歷宛非舊蹠蹠臻悲鳴荆榛亦旋茂
徘徊婉與變美服誓誰就亦有丘園士感此若懷疚幸已謝榮肥
遺身入孤陋村中杏花繁籬外春山秀及此土脉和渠渠理耕耨

讀陶公詩偶舉大意似聖羽份人五一慧玉

有論

靖節詩蕭機玄尙直欲舉大風栢梁短歌公宴漢魏間雄
武之氣一掃而空之以登于考槃北門之什似離騷歌辨
亦在然疑出入中也至齊梁三唐彼何知有此世代而區
區謂其閒澹有以相勝此後人弗論世而管蠡柴桑者矣
乃易世而有輞川太祝京兆三子者又能變化以廣其意
令從陶入三百功力倍取資博而意象更覺日新則後起
羣賢不可不勉也

迢迢漢魏季陶公生其間義恥食宋粟投紱歸舊山日飲籬下酒
坐看飛鳥還托跡類混濁希志惟孔顏力革雄武風和鳴擬關關

華月耀清流素雪標晴巒慮靜理復深大雅賴以班斯文去千載
微言何繇攀多謝王與儲餘聲猶潺潺京兆負潔姿靡難強自刪
余復後數子步趨益孔艱三復考槃詩鐘鏞無敢喧咏已望柴桑
天雲將何言

郊居雜興

郊館亦何豫懷此青山影孤舂響花樹閒汲藉苔井耳目克自繇
物役始知省艸深汨牛路松晴曙禽境恬行春野中四矚雲光靜
惟覺和歌聲農喧未能屏

徇物固溺志絕俗亦近名何如井里間努力籌桑耕春深花藥香
氣暖倉鷗鳴蓐食起負鋤自向田間行人生衣食交疇復無一營
田祖未可要悠悠風雨情豐穰縱安希聊以畢吾誠

野綠何茫茫莫辨行人路我居向山曲艸樹復糾互辟穀恥未能
炊煙時一露遂引同心來琴書展情愔惻际城市間攘攘頓成悞

綠香蒲水壯清吹松風驚于此話桑麻坐閱春山暮夷猶詎忍分茗糜聊已具

蘿葛翳山窗夢境亦沉邃覺聞松際禽始悟晨峯翠是時力作人起治田中事感彼力能勸吾生理恆遂既念黍苗深和澤久仍闕蹉跎違土膏輾轉動長喟賴此中林鳩交鳴慰予意溝塍導潛脉樵蘇徙賸地風涼雲已卑南湖雨當至

春夜野館獨飲有懷前之弟讀書松閣

向夜山氣流春艸飲繁露閒此燈下心感彼蟲聲驚卽境固無欣深酌漸開趣思君晝諷暇松園展恬步偶察乳禽鳴時與落花遇和澤幸已稠郊原綠咸嫫何當擊琴樽薄訊蘼蕪路

曹梁甫過訪因談望中龍山之勝

遠游洵匪尅塵務恥所營遵時自飯牛努力原上耕蒲杏候何愆屆夏苗已深乘閒坐新樹悅此黃鳥鳴是時朋亦來切展平生情

情中野略周旋柳下陳班荆春醪釀已綠持向巖戶傾藤花次第
飛田水參差明悠然至頽陽聊觀世上名

夙愛龍山秀結室翠微裏種藥不知名採薇念茲始君抱玄暉情
舍爾青山美巾車過其間睇笑亦依此雨餘百艸香雲播千峯詭
何當偕素心來問巢居子

松閣同搏仲損之衡之兄夜坐臥聞風雨賦此

山氣生夜涼蕭機革塵侮明燈艸蟲次彌覺清言臚倦至歇琴樽
支枕向終古夢路復何寂迨覺聞風雨竹戶竟如晦松聲遂交武
幸慰東作期歡歌動塋圃時暮友朋珍代降農桑愈悠哉白雲心
繇來幾人取

雨霽晨起展誦友人至

野臥獲自便申申復何慮松涼潛入夢蚤覺未當曙不知林雨收
微悟山禽語是時力作儔蓐食向田去竹光漸浮動簷戶各森著

予復何所爲澄襟展書疏性情理彌獲艸木旨咸預哂無干祿能
悅心聊可庶

同徐雲仍張損之繇郊居至佛嶺田舍餽

息影假郊扉塵欺未能屏志氣復不怡幽栖興彌耿燦燦堯時天
白雲挂高嶺遂招禽向儔迢遙越農境繰車響疎竹筍梁演繁荇
林音鳥何驚山氣綠初靜始悟耳目目前忘機即箕穎聊就田家飯
餘暄漱苔井悠然山鐘來谿步更偕整

繇佛嶺至龍泉菴旋憩石巢

石路交初榮櫻篁綠已衆循此達蓮界漸覺天花縱古壑寓聲聞
諸峯侍云動空翠如有人香端轉孤誦松屑薄作炊薜陰更閑夢
四大忽焉無給此清機用

宿石巢晨起

山夢自難繁嵐翠警空想即此寓覺因矧復風泉響嗽嗽聞清猿

流音動雲莽始悟夜來身臥此千峯上展轉至高旭巖戶納虛朗
艸露氣象浮爲疑碧岑長

溪亭

石瀨何濺濺朝昏破青靄云去龍居近能使川雲大初至趣如失
稍定理徐會礪藥雜飲香風篁漸交籟靜覺物象繁自負逸民泰
輕衣懼谿晏轉屨值煙沛境絕俗已殊林靈鳥仍昧數峯爾何心
蒼蒼立簷外

從石巢至平等菴宿

眞隱亦何佳寬然良自足寫性與澄潭等身若羣木兀兀無一營
稱心進茗粥遂與僮稚諳相呼共嬉逐飛土射松毼撥苔探谿族
凡響哂鐘梵方言亂樵牧隔峯聽猿聲冷冷度深竹憶茲境當殊
遂就白雲宿繁禽旣展林素煙亦翔屋于此洵所愜在彼念非曠
野興固無恆聊當謝寒燠

夜聽平等巖下雨

青林艸木糾氣盛自爲雨向夜稟山蒸其用途能普清響入空際
蕭機感靈府旣念肅聲聞彌希暢田圃苗深澤猶闕枯槁欲何取
所恃天仁垂子遺饒所憮滂沱以終朝霑潤及高土凡我栖林禽
願作商羊舞

平等菴竹下壽徐雲仍四十初度

修竹綠千竿長留萬古月況復切雲巖妙香時一發臥君于此間
白石煮薇蕨松栝引清夢雲霞照玄髮祝君再四十步履更超越
耳長眉至頤其健如山骨余亦策靈壽相從結谿襪羞稱曼倩生
蟠根拾殘核

雨中遲宗白不至

近有溯江魚傳君泊采石錫越雨花香帆挂天門碧遂先杯渡期
拳烟弄輕策旣安青翠身還念遠游客時見故年松新條忽盈尺

林下苔逾軟窗間雲未釋衆鳥鳴施臺山鬼伺花隙相遲寧弗來
奈此風雨夕

山中五日懷次魯客江上

與子靜相見閒雲及芳艸兼此松際月時向潭中杲想子江上心
應懷薇蕨好楚些激靈波離思更難稿雨止山青開泉聲喧一道
煙駕念當來巖花落恆掃蘭芳彌話言靈谿澹何討

贈種茶僧輝虛

上人住高峯眉端凝古雪種茶了一生經綸入萌蘖徒衆各承習
遠近甚傳說斯知一念深于義亦超絕餘力墾山園蔬藥宛成列
編荆限鹿羣揮鋤避蟲穴無事鍵巖扉兀然安蹇拙衣食既麤足
儔輩每和悅循茲畢天年于君覩明喆

山中憶瑕仲子卿价人五一應試秋浦

明月江上來照我山中扉虛白亂潭影荇藻交澄輝徘徊于此間

感歎焉可稀遂彈石上琴中夜流清徽栖禽響深竹露蟲鳴且微
願托松下風吹君秋浦衣九子青霞開能靈芳艸機玉笛弄江煙
文魚聽以飛酒碧菖蒲香酌之願無違

署月園居偶成

喬木結清陰端居若深峴涼風北牖來當暑趣彌善遂釋手中書
枕簟聊一展任運已忘心夢覺復何辨塔前白日移林外鳥聲嘯
坐起眎琴樽意至惟所撰詎屑方世人直覺巢絲淺

鄭公露從嶺南相訪感賦

窮巷若層岑跡罕境當邃庭欄宛已秋况乃清商至客有宋玉儔
海珠抱奇字云從獐蛋居更與山都戲樂是陬隅謠避此蟪蛄地
萬里就蘆中吟觴藉相媚江邨黍已香菱蛤亦堪刺對酒復何嘆
盡此林山翠夕月念當佳開琴禮松吹

園居池陽李司理長度見訪兼惠以詩稿

門閒未交夕艸際百蟲吟檐間挂高柳床上橫孤琴野風時一來
悠然吹我襟炎曦被廣衢緇塵貫華簪感彼噶噶車稅予嘉樹林
冰雪閑話言茗粥未及斟世人競樵蘇古誼多不尋長跼受琅函
服義良已深習習蘭杜香寥寥韶濩音三復松窗中庶觀君子心
一官寄秋水海汐復江煙小艸卽奇樹五斗如璣璇何陋五指苗
來觀九子蓮青峯隸朝閣碧月迎夜絃自云食鮮魚何如跼飛鳶
一郡絕訟氓歸種春村田長日枕丹經高松眠晏然及其當讞詞
漣漣鳴春泉豚魚亦咸孚掾曹無敢先采采涉秋浦浦花繁且妍
香露漸幽襟纓歌爲君賢

園中止水宗白過訪

端居閱秋序高樹閒柴門意象日疎豁始知微尙尊偶看耕稼書
如共漁樵言法侶覘我暇步屨到我園林蟬靜自聒山鳥閒來翻
衣聞蓮露香飯啜菰米溫曙羲微雲霞緒言雜寒暄月色凡幾皎

沙埠潮幾吞汲井就何泉種藥何畦繁逍遙深竹間盡日煩討論
長話未及半夕陽照雲根子隨江月歸遲予叩山樊廚羅菱芋族
石掃莓苔痕小逕從蓬蒿余方辭高軒

懷錢豹叔授經桐中

庭樹日蕭瑟江雲更沉沉夜夢龍眠花不知秋淺深美人弄山月
隔谿彈玉琴清風谿上來悠然吹我心我心不可道離居憶春艸
青青水上蒲纂纂籬間棗把酒秋蟬悲閒門葉堪掃時序閱艸木
風物感懷抱願遺紫芝英使我顏色保

月夜懷幼玉長秀江上

月從江上來照我林中露清風與之俱竹香瀉衣屢蟲雜涼籟喧
螢犯樛枝度思君未應眠看月轉江樹婆娑清景間獨酌自成趣
石門秋水香夢遊吾已屢何當載芳樽共汎芙蓉路

田間雜興

理策赴秋山山遠趣彌殷其中嵐彩積不異城市氛來往巾帻間
知是何峯雲隔谿見艸堂依依散斜曛禾黍被前坂樹下牛羊羣
入門喜僮僕能令四體勤遙泉上桔槔爨室資斧斤東園花木稠
藥畹次第分冷冷脩竹枝萬葉搖清芬飲此青翠光使我心顏醺
揮手謝時哲吾廬吾已欣山木笑徒壽餘情何足云

屋前樹榆柳屋後樹松柏匪徒資蔭翳實以延土脉我居安且和
作息俾無斃敦此井竈常力彼塍圃獲丘麻相歷亂田秫載狼藉
鷓鴣日以鳴我心顧反憚酒滴山厨香衣縫秋雨夕晨起望前山
林楚淨寒碧舉觴集隣老笑言動巾幘薄暮聞田中遙遙來下澤
誰云翟公門鳥雀乃如客

雲厚天色淡秋山帶餘暑鳩弄春巢鳴潤上前楹礎芒芒荷篠翁
歸來向牛語南湖雨氣白指點約暘墅婦子各紛紜禾稻安其所
散步衡門前悅此好情緒暘雨信有徵動息諳古處池藻泛羣鴨

林果抱山鼠物性誰不耽悠悠莫爲園開帙對古人引杯酌芳醕
松菊繇來佳吾亦識所侶

結室面東湖風來湖水香隨意采菱舟黃綠洲渚傍香靜月色吐
清輝照中堂澹澹螢火流泠泠竹露光絡緯抱花啼啼聲亦何長
隣女弄秋梭竟夕燈火張晚田虞不給餘布易我糧聊以贍兒女
非爲成衣裳感此勞者情終夜爲徬徨湖波豈不豔菱葉亦以芳
刺多泥復深采采中懷傷

月夜同吳幼玉劉長秀泛石門湖便至百子山莊兼過長秀
穀居

秋色湖上好水木清有餘落日映微波我情將焉舒閒棹弄明月
牽我良友裾香逗浦中菱響接川上魚流文蕩心目琴樽泛空虛
颯颯鳴幽林風吹前山欄劉郎憶花源余亦懷田居各指雲峯尖
帶經思共鋤山葉接繁影犬吠連深墟遂偕同舟歡理策矜筍輿

初覺石路狹再轉芝術疎慙憩林竹光旋造精妙廬藥露滴後院
星水靜前渠牛羊臥秋燈鼯鼠窺殘書復傾林下酌笑言彌唯于
還舟月亦斜雞鳴旦方初塵務豈慮逼所悲良夜除

曉園偶懷前之弟

曙月如纖雲不共秋河沒步起向西園看此興超忽朝暾接露光
鮮采蕩心骨步屨憺忘還誰謂清景歇秋竹池上閒寒輝夜當發
將子抱琴來山樽共餘蕨

九日詩

微雨空籬獨酌行盡客有過我欣悵交集遂爾賦詩

達人貴神適寧爲時所娛耳目踵昔賢千載徒區區我心抱故常
節候如欲無久暄山氣燥涼雨知爲濡籬圃意方澹蟲鳥音諧蘇
家人欣致詞叩我何所須啓罍登纖鱗飯牛有餘餽閒對門前山
罄此籬下壺遠遊無乃勞即事天雲俱

聞劉起伯談蜀中山水諸勝

閒居罕物役煩暑逼孤想安得弄青雲振衣峨眉上俯矚紛龍雷
賓空謝倪象劉子彼土奇登探副心賞層霞若蕩胸幽靈亦指掌
能先杖屨尋深以話言獎峯居想像危慮汎烟嵐敞遂令清嘯開
炎齊百泉響

七夕秋情呈從祖樵川公

夜靜河氣白迢迢星宇晶服箱竟有佗停機空復情若木曙光啓
天雞東海鳴俯予何可嘆虛此嘉會名

雲旗杳難卽長空秋沈寥蜺局視世間蔚薈以蒸敲隕石旣軫慮
騰梭安所饒恆願依天津孤景同逍遙

平等菴雨宿

晏息向秋窗葉聲蔽山雨夢淺妙香侵宵孤百蟲侮慮盡復誰在
境真安所取紛紛巖戶間微覺天花吐

將抵采石元甫書至述懷便答

挾此終古情蛾眉禮遙月肅肅蒲葦根霜華靜逾發高天開曙啼
初霞飲寒髮江潭霽春雲流澌亦將歇含睇向晴蓮孤青表山骨
石瀨寫幽心林香斂閒笏將子帶煙蘿霓旌泛超忽

雨泊蕪湖謝羅侍御澹研招飲兼志別情

寒雨滿天地蕭條况孤舟盡此一樽歡爲銷千古愁芳醕耿華燭
雪唱翻輕謳高竚琴書閒靜哂天雲浮梁肉坐崎嶇世人如此否
橫笛弄遙月旅雁懷烟洲相共此山川白雲何離憂

梅根治得友人書有感

馮鬱亦何極登栖各有方雨雪蔽中路鸞驥安得翔浩浩洪流波
泠泠星露光悱惻不能寐飄風爲余長抗旌則有霓總珮亦有芳
擘睇復不怡初德焉可忘

靜理椒蘭心當如歲序何白日既晚晚相媚以山阿亭亭寒木稠

冰堅竦其柯表立妍雲容楊靈寫微波舉肥無爾賢鹿豕將媒和
寄言蘆中人相期寐無咤

雨泊泥汭有懷曹元甫

積雨晦天色空洲寒自生渺然失江海舟楫難爲情漱流慰閒汲
委句懷芳英孤杯歎春醪感念何能盈

秋夕園居有懷姜侍郎仲詵傅祭酒子京

秋夜不能寐起視星漢高閒知幽獨尊靜惻云動勞風林驚衆音
栖鳥求其曹偶影向園列我思何忉忉藥埤寫閒月露坂零長蒿
風來隔淑香悠然吹鬱陶上有芙蓉花下有鴛鴦翻采之漣漪長
執之無輕舫

瓜埠月下舟行有懷潘木公

澹月寫空水微烟綿夕林于此理閒機愴然生遠心臻響蒲葦肅
吹寒霜露淫何以役虛無援琴閒所欽海氣千里白蒼青竦遙岑

颯然風雨蟠吐高而含深古處不可夷
浩思焉能任

同吳仲立張損之周公穆集汪士衡湛閣

久暄霜氣愴月白烟冥冥蘿篠飲江色
颯然延秋聲媚以觴咏率
賓之池館清冲意理音樂窅視開檐楹
寤鵲察孤光夜定匪一鳴
飛星落寒溹潛魚啜其英觸物忽舒嘆
偶影誰能并賴有樽中香
爲怡千古情

雨中遲木公不至讀其詩

危雨挂疎樹吹葉識何托於茲載客心
百端斂寒閣洲暮惑鳥情
藻枯格魚約晤言藉心聲延思向寥廓
偶影孤宵中杯香爲君拓
再答木公詩訊

孰哂元氣薄江山森此材壹稟先民程
而持孤鳳衰寒思削秋碧
綺則春雲開曼聲事溝澮吾道行污萊
獨拍稔衆咻善者失所裁
有美負鸞情鳩鳩無敢猜三山表雲容
勢與天波廻

殷徵卿自楚中見訪不值旋舟下真州賦此

蓄此芳艸情遙遙弄寒汐林間風雨聲霜下雁鴻夕鳴雞撫空館
隨鷗怡海客餘興不可宣復挂東南席開樽發吟眺援琴寫今昔
江海自多感離居矧形役意至閣笑言憂來無羽翮曲終江月高
楚山向君碧

春夜同葉以冲越卓凡先生集卓左車械園

春疇野煙綠是處聞空香山翠旣虛無月氣殊微茫奉身入清機
耳目非故常向夜竹籟喧栖禽念歸翔小碧摘園蔬靜御燈下觴
哂時啼笑開酌古離憂長雞鳴桃花源犬吠華子岡夙隱千峯外
今居綺陌傍始悟高士心慮澹景亦荒琴書一念深舉世無敢狂
余方負遁情愴然托菰蔣時依落花臥或與孤雲颺君尙還高柯
爲余挂蘿裳

余未也招同陳旻昭集烏龍潭賦

潭定水光白諸煙無與爭落花靜可數時聽閒魚鳴無言酬清機
林月悠悠明遂永巖下觴聊側世上名杖藜出山扉蘿篠咸有聲
歸覺衣履間空香爲我盈

余夙枕山窗身心禮寒碧妙香旣氤氲清論復開圻違此行七年
魂夢未能釋潭月與林香茲來宛仍昔卽事懷天雲故人念荒謫
玉樹流春烟叢蘭冒幽石賴有白社賢開逕代研益

用韵和王計部界菴脩禊詩

冶城秀春雲河柳日以舒悅此煙中禽關關鳴我廬含香有俊人
清譽騰璠璣閒種烏衣花倦枕梁園書奇服挈芳蓀鮮韵標芙蕖
芳醴旣延酌嘉賓復連裾衆綠醉香光修竹如未徂余方理荒疇
百藥手自鋤永懷蘭亭歡未副柴桑輿薰風拂瓊樹字字來華予
脫巾漉松醪整釣翻荷魚何當辟逕苔旦夕廻高車

行宛溪道上望敬亭有懷玄暉先生

初晴山氣正艸木香未釋宿烟旣展林落英屢沾幘余夙眷峯霞
茲來踐苔石感此景候佳彌悟身心適敬托孤飛雲寄訊山阿客
嶠月洩光儀松風話疇昔漱齒動寒泉開琴響遙碧嶽嶽聞清猿
庶幾領三益

至姑孰懷敬亭

夙眷敬亭山茲來發深省綠谿寫雲木俯見高峯影朝霞飲虹梁
夕月掛猿嶺鳴琴矧多賢泠泠動花境化行俗以敦質具文彌炳
滔滔此何時人和卽箕穎平野列稠桑深村樹繁杏誓當負釜舂
八口隸烟井祝雞土屋喧飲犢苔泉冷悠然懷古人真趣遠而靜
幽渚洩空香孤雲弄鮮景遺身沮溺儔琴書詎能屏

同以冲少宰潛夫同年雪照恆覺步明月峯微雨還方丈宿
已而霽起看月偶成

雲松蔭野心閑此林中步艸暝氣亦和空翠自成露次第閱歸禽

却立饒有悟前峯至餘雨山葉鳴已屢絺衣念當濡遂斂高霞屨
薄展茗粥歡悠然竹房暮

微風吹石髮向夜集山響寄高峯間陶然謝心想覺聞竹露香
微度苔花上孤懷遂難持起步矚蒼莽潭定藻影開月白蟲吟廣
山鬼不可思青蘿洩英爽

過卓凡北窗下偶成

越公負鴻略違時挂卑網謫居滄海隅身恬趣彌蕩茲從執戟暇
散髮秦淮上窮巷隱雞聲紅藥緣堦長隨意植梧竹風來北窗響
猶愛陰符經焚香寄心想抱膝視世間煙塵日蒼莽而我閒有餘
清言共欣賞笑矚鐘山雲無心自來往

七言古

招姚康伯光含萬周有邵吳湯日潘次魯家茲園公長子叔

飲椒園

白石何齒齒華星亦桓桓短襦冒重露對酒開長嘆客從遠方來
授我以雲英一服云色好再服令體輕揮手爲謝客天道焉能明
憂從中來撥將如何身之兕虎手無斧柯扶桑昏昏翳天際精衛
罷銜海波逝公且渡河奈公何亦復誰能長厲揭我胡爲者枯蓬
中五絃方聽彈薰風

元會以還復誰是荷鍤差無落吾事星高夜白傳樽空悵望糟丘
起長嘯君不見西山春老薇亦荒棗花麥秀吹茫茫又不見桐廬
之濱一拳石潭靜煙深弔寒碧昨日朱顏發華滋今朝清鏡盈霜
絲笑盡一樽苦不足君胡對酒長嗟咨年光如顧人嗟咨長江應
有西北時

讀書佳山水歌爲王水部遂東遙賦

東南懸圃推稽山蒼煙聖沼私其間草木各能雕日月鱗羽相與
驕瀛寰先生覽揆適茲地坐見剡區泄靈異情至能枯怒壑鳴毫

飛特博高霞忌卽不讀書無不可蒼頡以還具瑣瑣乃其冲意無
端倪讐較參辰及蟲螺小結檐楹就寒碧鴻濛宙合紛來宅遐綜
山海割眞靈載遐隣虛簪纖脉踰塵寸寸研鮮雲呬唔亦掩秋蘭
芬閒招山鬼諷明月詎屑桃花濫世聞枯梧大笑莊生據亦恥山
廚乞殘蘋恬從秋水照吟魂饑向青峯質危語乃知先生帝所昧
綠字丹崖許標概不將淺籟接清哦肯弄凡煙格玄對我欲從之
何所遺隰有苓兮山有枝孤舟天地閒雨雪此興悠悠無盡期

答錢密緯以詩見期

閒雲與飛鳥客心良可見擊汰鳴秋花琴樽意方安三山能有情
流雲滿江甸碧入空明盡候爲遠遊善山中之人啼笑長詩來屢
割秋蘭香水撥閑魚待垂釣野籬扶菊容銜觴窈窕向人青若語
更覺朋從感孤慮星翔露白沙路開夜夜三山延夢去

東海鵠爲衣文學妻王節婦賦

黃鵠海上來雙雙避繒弋如何大運至中道轉相失其雄徂落高
雲翰雌者絕吭青林端似當持此告鸞鳳簫酌絃接難爲歡日落
波心海山綠腸斷猶聞杞梁之妻哭終古精魂不可招願下靈風
女貞木吁嗟乎東海鵠

杪秋同李煙客周公穆劉爾敬張損之葉搢綽劉慧玉宗白

集汪中祕士衡寤園

客思秋深不知處寒吹孤霞滿江樹落帽遙從雨葉翻空樽笑向
林山暮因尋勝概青門隈陰厓曲沼參差開雞犬猶嫌傍秦叟芝
苓何必窮天台茲遊礚礚彌有緒觴咏于今益佳侶靜矚能疏潭
底花高吟直擾林端嶼幽情旣暢遊目舒主人敬愛將焉如水檻
迎波還射鴨水盤帶露長炊魚玉簫金管且爲適此際何從感蕭
槭歸途冉冉御春煙花月空江宛然白

豫園別虞學憲來初

秋花潭島紛紛亂，屢日窮遊憺忘返。恬月長栖檜栝陰，晚香不輟
茱萸堰。主人奇尙逼高旻，霜庭宴客春風生。嬌歌儻舞歡不足，蘭
燈還奪九華明。榜人擊鮮出，靈沼蒼頭射雁喧。馳道南莊漁獵何
足云，會見西園盛雲藻。祕書遺卷時復親，石牀澗戶無纖塵。世事
豈殊看蟻芥，樽前詎忍疎鱸葦。半嶺遙遙裂金石，長嘯將君謝頭
責。莫移雞犬入雲中，令余夢隔仙山碧。若有人兮曲之阿，臥春星
兮蕩秋波。蘼蕪綠兮復來此，與君坐花下兮歌高歌。

江村歌爲王梅和使君五十壽

江村酒熟魚亦肥，穡車漁網連江扉。老人笛鼓賽秋社，醉騎黃犢
風前歸。粳秀荷香一千里，上世胥庭如此矣。傳來三戶殊未然，艸
木軍聲咽殘壘。螭帖繁響亦不聞，用貽之者維使君。苜蓿骨高鈴
下馬，梨花手演帳前軍。弧矢高懸，屈此節。繞案文書省，何輟赤羽
長。覘楚澤星綠髮，因添藐姑雪。四十九年非自知，少時歷落鹽齏。

爲雕龍會有神物妬圍犀不顧妻孥饑乃若永慕慕無數夢繞西
池酒香碧已從冊府拜花綸更向安期需棗核江鄉戶戶爭歌舞
不祝仙喬祝天姥二十四考歸未遲長向板輿劈麟脯帆園黃石
纍纍然余亦騎魚浮海煙升堂拜母斟大斗與君萊綵相踟躕

江上柬陳元朋

石頭江清楓復殷君胡不住歸舊山片帆雨掛岸艸濕孤舟月泛
滄波間舒州酒香入江霧蕭蕭石尤響秋樹丹霞已負荔枝期海
門且問蘘葭路吏部手中多蟹螯步兵廚內開新糟湖海相逢不
攖醉雲天長憶空忉忉

得侯木菴南湖秋興詩憶寄

靄靄嵩高雲飛向梁園宿風鳴脩竹枝吹香到江澳江潭漁父習
雙槳蕭蕭曝網蘆花蕩烟中忽墮霜鴻聲使人夢在南湖上南湖
之水碧粼粼主人秋興詩清新手持蟹螯對樽壘跡隨雁鶩辭風

塵塵沙歎忽成滄海白日蒼茫顏色改軒中笑竹幾竿存惟有西山月長在月出西山黛色青照君雲臥當華星雪苑欣同鷗飲啄木天還想鶴儀刑莘野春深艸花碧不用飯牛歌白石軒冤知君如等閒好爲蒼生赴前席

漂母祠

繡籠襲黃閑膏粱餒宋鵲當其委頓際纖波蕩鯁壑嗟哉鳥獸失飛走鷹隼翻遭雉媒誘大鼎饗人人不淪一飯沾脣復何有淮上釣魚長饑寒釣而不得身亦安雙瞳炯炯誰氏子何者爲猴何者冠乃知哀哀食進口徒養無雙好身手王孫悔受婦人憐亭長應澆老母酒

蕩子從軍行

洛陽城東遍桃李洛陽城中遊俠子彈丸長逐青門外蹴鞠時過綠楊裏青驄油壁矜繁華鴉黃半臂盤五花金距鬪雞贏大估銀

瓶絡酒醉倡家倡樓婉轉春如海白日青春有時改海西烽火照
遼陽官家赤羽懸相待雕弧寶劍去駉駉功成鵠印皆黃金健兒
自負從軍樂倡婦空爲頭白吟

詠懷堂詩集

卷三

石巢阮大鍼集之著

南海鄭露公露較

五言律

巫山高

巫山不可憶終古但啼猿
蕪絕夢中路青搖空際魂
峽深雲有族江濶雨無痕
靜慮撫琴瑟幽通理自存

閒酌

終始揆元化余情亦以閒
春風自難忍羣物豈相關
香激花中葉青颺雨後山
對茲彌靜嘿小酌展頽顏

春雪憶顏若齡讀書山中

春江何甚雪撰酌昧芳期
念子整煙駕還山尋紫芝
鳴琴林月覺

洗耳澗雲疲若更逢瑤艸遺之慰我思

高枕並山雪思君視聽清遘時固余事易地亦閒情籬井稱恬汲
鐙春無妄聲悠然循作息遘世復何名

園雪海嶽菴僧過訪感舊游賦

繁梅照巖戶殘雪復銜林感此香光氣彌澄虛白心鶯歌寒未續
艸色雨猶沉何處天花至紛紛點蕙襟

黃葉兼秋雨曾聽海嶽鐘別來京口月長挂嶺門松島漲龍難寐
花飄鹿易逢看余颺片席重訪鶴林蹤

周公穆張損之家衡之兄登蛾眉亭懷古

微波搖極浦孤嶼暮潮生旅泊已多感同人饒有情荒亭寄秋露
高屨越松聲目盡銜山日因知世上名

答潤州周司理芮公招遊三山

三山春雨外擘結及芳時明牧規玄賞褰裳不遽私寬雲延野鶴

遙露濯江離誰候鱸魚候相從整釣絲

山籬酣雀夢隱几簷微喧北固潮升壑南徐月到門揆雲禮鴻鵠
飲氣激蘭蓀秋海天煙合懷君在不言

喜徐介白自天都見訪

峯霞開坼處遙策下天都行李響空翠居停選綠蕪齋心踐雞黍
高興略川塗詎待陳良話君情已覺殊

程蘊臣徐介白還天都旋下松陵寄憶潘木公史弱翁

絲谿石何許靈異導余情上古苔仍在六時猿自鳴煙深閉漁路
潭靜落書聲別後抽思際清絃向月明

絲谿蘊臣讀書處

青楓延浦淑佳月夕長流望遠若爲夢懷人何待秋風螢颺水驛
露橘扈香洲浩思馮誰遣舉煙理勝游

送李烟客還嶺南

吾子區中秀誰言冠嶺隅飲霞恒若寐負月詎嫌孤思綺珠光素

情嚴曆氣枯予懷定難忍遙集海天桴

知君度嶺日行李入梅花海白欲何際峯青則爾家鶴來延夢路
鳥與導歸霞琴酒攸懷際羅浮月未還

久客還鳩嶺艸堂

明農安舊隱吠澮自依然竹暝登山路葑侵負水田分峰長簷日
飲犢亦掄川細較吾生事終推沮溺賢

山夜有懷潘次魯居廬

山庭恣散步不寐一思君至性應悲帖離憂各抱雲松窗微月吐
竹牖暗泉聞想見支牀際懷余夢亦紛

世事寧庸問其如高枕何儘容恬寤寐無可寄悲歌山靜烟雲秀
林深鳥雀和秋籬能就菊爲爾撤門羅

五日觀渡卽送人還汝南

靈均識何處終古權歌聲衆美此深酌澄江凝遠情水嬉亦胡極

蕙嘆幾時盈且就滄浪曲晴沙笑濯纓

狂歌盡落暉望遠送將歸試極雲天目難令月旦違木陵桑影厚
蓼國秣田肥何必聞長鉞知君思已飛

柬瑕仲約往看杏花

美人容與處山暖杏花繁遙憶青林曲能無黃鳥喧澗松聲滿戶
湖芷氣暄門古意持芳月深情含未言

越卓凡出天界同宿月下賦

幽人共明月不速至空林今夜蟲啼處秋花如更深風榛無淺籟
露篠洗閒心偶影山籬下爲君動薄吟

春暮得賈方伯孔瀾中州書

千里夷門艸青青直到淮晤言殊有托寧采復何乖隱几河流靜
開帷嶽色佳知君爲政暇于此寄高懷

坐綠夢居賦送一門上人北參

精廬閉花藥息景亦何深偶至隣峯衲來分秋樹陰清機閒省竹
良話靜開琴即此戀攜手寧堪判蕙襟

思君錫所指來鴈正南翔黃葉孤舟雨青燈旅夜霜石經雲未綻
靜琬樹猶香一施名場法蓮花社莫忘

送桐城李主簿召卿移雷州衛幕暫歸莆田

三載佐鳴琴耕桑處處唵孤舟從此去僊夢亦何深幕畫驚蠻鬼
春聲革瘴禽雷陽梅早坼莫不寄江潯

山中懷若齡久客婺州

婺女高空夜猿聲給客聞炊烟冒嵐彩旅夢接山雲磳戶風琴歇
春谿水碓紛荒庭女蘿色延碧待夫君

久不至菩提菴偶成

高枕代千峯香林至亦慵片籬江市隔丈室雨花封貫圃蒔春榮
超烟響暮鐘見聞殊往昔吟賞更無窮

秋村

卷跡蘊茆下秋窗閒對雲竹疏山氣透荷近稻香分款客盡家釀
爲農無異聞土風自淳朴敢曰厭囂氛

村夜

坐聽柴扉響村童夜汲還爲言溪上月已照門前山暮氣千峯領
清宵獨樹閒徘徊空影下襟露已斑斑

止水見訪集園

結制何蓮界茆齋過亦稀苦參知畫粥行藥倘開扉畦冷藤花老
江深鷺影微潮聲秋更響應觸法王機

村居歲晏

歲暮偃村廬中懷此晏如烟聲爆山葉雪影漾窗書寒覺雞豚斂
貧歡黍粟餘充廚多美酒不醉復何須

出山別社衲

寒谿相笑別君去臥山樊欲雪江雲厚將梅谷氣暄風霜知夢苦
歲月藉詩存切莫嫌蝌蚪閒居廢討論

香界久依依風塵意已微何堪車馬路長逐雁鴻飛種藥晴燒圃
翻經雪照扉石門秋水動整檝待予歸

述懷答陳不盈吳遊返寓江寺見投

江潭吟賞意不媿白鷗知偶爾春寒甚悵然芳艸遲楚狂勞諫鳳
高皓誤漁芝自倚修林竹蕭蕭閱歲時

秋夕同鄭公露坐循元上人綠夢居

野雲挂秋竹予意與同閒薜葉甚妨路荆扉何事關夢青松雨後
夜白露花間祇覺無言際星河侍定顏

秋山鐘梵定諸感觸無幾堦藥立方靜艸蟲吟亦微林空聞露響
潭曙識星飛此際形神影何煩辨是非

喜宗白微喻博山問法歸

曳杖問禪栖花深路轉微隔谿聽晨諷知是山僧歸其地背塵俗
所言俱道機江雲何靄靄閒挂水田衣

領却西來意何妨返舊山經行松界響歸臥竹房閒樹色晚逾邃
江聲秋又還六時烟水曲寧異萬峯間

將抵三山登高東潘木公

三山栖海口艸樹挈秋雲鐘梵于焉動天波始覺分結廬馮此地
把釣復攻文兀兀閒居賦高深得似君

烟霜弄遙席疑義就君翻彌覺兼葭邃從知雞黍尊萬年遺帽舞
三徑古花繁率此成賓主青山檐盍喧

憶宗白秋客海嶽菴

研山翔皓露禪定結其中夕鳥銜情入秋花質影同艸閒星路永
月展島煙窮是際颺輕席從君簪海鴻

江行有懷趙侍御二瞻

沿棹意何適江流與政平葑香蔽漁屋水族省軍聲候正秋虹斂
潮升海鶴鳴野夫漱寒月小酌咏樽清

奇輝開寶璧江月更如規雲氣通仙掌菰香竊漢陂威名高隼避
仁聞野鷗知擊楫勞封事河山未許危

喜葉孺韜至金陵舟中小酌感賦

湖海意何適雲帆君共翔寒羣集鴻雁秋夢達煙霜蒹菊觴難制
儔登舞易狂餘香重拏采未覺露沾裳

物情何足哂入眼且交娛立渚見恬鶴爭煙聞亂鳥頌難申橘柚
嘆不歇薜蘿藉有山樽在秋江月未孤

舟中彭天錫見過

汎宅如籬下良朋晨夕來看山臻薄諷陶菊藉深杯野雀煙間旅
繁蟲露下開狂歌動清夜海月更崔嵬

送方聖羽吳元起失解歸皖

秋雲飲江水片席入遙空橘露朝炊地蟲聲晚泊中風煙今特著
遇合古原同君但陶樽疊江田黍正豐

過印海方丈

過君焚誦地深戶立秋花閒與巢鳥似晝聞山鼠譁巖身等羣木
鉢水濾恒沙自說空林日婆娑未易斜

李小有錢密緯遲予三山偶葺屋未赴

敬爾三山屨高雲托遠心遙聞遲片席君亦倚孤岑野圃花棚廢
山籬橘刺深予方操短築結搆向荒林

客中晚坐江亭有懷吳幼玉顏若齡

欲暮江煙動秋峰翠轉深客懷何所寓是際惟孤吟黃葉燈前夢
青嶺嶠外心高齋山響夜知弄逸人琴

客真州喜杜退思至即招集汪氏江亭

幾載離居夢因依瀨上雲如何黃葉岸擊汰得從君汐滿標魚路

煙卑抑鴈羣林亭對紅燭良話尅餘醺

吳徵君充符招集修竹菴

煙霜挺寒玉數畝竹風清是地入古寺主人兼勝情天花雜蕁飯空翠警書聲歸步逢新月悠悠篠路明

江路同友人行攝山道中夜宿恆覺上人禪院

帆影青山近佳遊詎忍疎友朋情並勝杖屨興彌舒望鳥悟煙路聞鐘禮誦居松端開翠闕步步達清虛

葦窮阡術見野徑省間關山氣固無格居人亦以閒霜花平墜裹石竹小橋灣即未探靈異茲情詎易還

林嵐兼夕靄積翠失花宮是處聞清磬因香叩遠公堦喧黃葉雨社準白蓮風更向瑣聲指雲峰碧未窮

聞張損之自白門來期入鳩嶺艸堂

木落鳳皇臺悠悠思獨迴人依賓雁至帆載女霜來古堰修笳笳

寒原息翳媒如君問奇字詎肯鑿山坏

石路秋花澁幽尋莫厭過樽香秫田穫山翠竹林多地僻庭除肅
人閒艸木和飼牛遵俗尙叩角恣高歌

出攝山至江口候舟不至因宿旃檀菴枕上作

安心向黃葉旅夢亦何閒乍覺堂開誦還疑枕在山雞潮寒月外
鵲鐸古霜間此際觀名利何機觸定顏

冬日同潘次魯劉爾敬坐天界綠夢居竟日

貞林寒不解鐘梵動其間遂共同心者拈花薄作閒松沉銜鶴嗽
翠盛澤禽顏隱隱空香際諸天似未還

四大皈寒碧香林夢亦無恬行融飯力危坐禮琴孤點石花長雨
資煙葉正枯此中名利判清淨復何途

依韵答潘木公舟中見懷

高興乘無極孤舟漾綠蘋風浪昔賢詰法漑幾由旬塵淨梁開月

羅荒鳥狎人何祥
匯龍德縮地向靈津

艸堂廻道駕象緯
豈虛關古誼扁舟是冲情
從者閒攀芳寶幽谷
翔益負三山清論如瑤艸
華予澤畔顏

送吳湯日遊閩并訊曹大參能始園居

榕葉青深處君行聽鷓鴣
桴長天欲坼琴在月何孤
翔思窮雲海搜奇軼貢圖
石倉鴻隱地好一問潛夫

俞駕部仲茅左官賦詩二章爲賀

君復持何法終能蛻一官
特資高隼力長漸遠鴻翰
蔣帝山無恙孫樓酒未寒
予狂殊已甚莫惜割餘歡

燐火綿羣望腥波達具區
蜉生衛猶拙虎子執何愚
烟雨筠三畝風花柳數株
人羣笑誰可鳥獸勝吾徒

方密之見訪卽送其遊吳

南浮敦悅地君復振華音
塵下概千古霞端翔寸心
固窮榛艸在

安土稻花深何事元方御來參抱膝吟

擊汰復何適白雲吳會長江楓寒秀色海月弄秋光古市簫聲斷
高丘劍影荒煩窮練馬義一發步兵狂

寄懷方式谷廣野伯仲

龍眠嘉遁地石瀨與溪光夢亦哂塵事饑還擇晚香開琴林月靜
徙藥澗雲長江介饒芳艸知君詠不忘

不見何年歲離居未敢思江雲空靄靄野艸復祁祁清夜弄瑤瑟
高煙鬪紫芝秋山有叢菊好一就東籬

喜史弱翁見訪并閱松陵徐介白湯俊民諸子詩

寒芳何遠涉子自導其心幼志托嘉樹高歌懷蕩陰淩霞無弱思
御夕有孤琴太息扁舟誼誰堪攬蕙襟

吳趨元楚楚君復事孤鶩遂約江山氣爭歸金石言筵簞心自苦
綿叢道何尊余亦興觀者狂歌向海門

登攝山頂題曇林禪室

不知禪誦處清磬鳥巢懸百藥延春氣羣峰侍法筵澹游如閱夢
空慮直賓烟日暮松風起雲霞共謾然

春初齊价人相訪余適東遊率爾別去茲復見過賦此即送
其再往臯城授經

臯城函丈地飲啄判春雲作客心如艸懷君夢亦芬琴言酬定夕
霞氣避高文想見傳經暇風前咏有聞
剝啄重陰下開樽御晚涼人偕江雨集吟割水花香又欲驅征馬
悠悠載夕陽秋林應爾思明月挂高霜

答張孝廉紹和白漳南書訊

客星辭詔後飲啄入青岑海雨蒸吟閣峯霞標執林書經雷電至
夢集芷蘭深遙感成連旨空江弄玉琴

鳩嶺秋穫喜汪偉長從樅川見訪

之子能乘興扁舟湖上來正逢穫稻日薄暮柴門開野臥枕山竹
村酤稱土杯雨暘馮縱語田父定無猜

夜坐依巖竹翻嫌衣屨涼悠然山月吐微識露花香水羨魚情逸
烟懷鳥路長此中無外事惟有靜銜觴

秋夜雨中同木公幼玉若齡集孫烈卿玉照閣古梅下共用

晴字

小閣延眞意羣芳多晚成從君探嘯旨沉飲入秋聲涼雨冒春響
繁燈爭晝晴寒香彌可憶遙思向孤清

寄懷馬侍御訥齋

白露下庭梧空江雁夕呼伊人宛何在高咏孰能無天造荒雷雨
時情賤鳳圖絳紗聞更啓歸集舊生徒

薄暮同胡衷朴白瑕仲方聖則鳩嶺野望

授衣亦成適蘿薜稱秋顏吾道籬間菊朋樽湖上山潦收漁務整

暘淨穠車閒漸覺村烟合
栖禽向我還

鳩嶺秋夕喜方式谷肅之姚繩先見訪

停雲懌遙矚亦復集高霞
賴有貧廚酒能酬晚徑花
月林開象緯秋影貼簾
葭感此幽貞意山禽靜勿譁

昔人應未達雞黍跡猶存
蕭槭秋盈樹荒寒月到村
于中成野聚是夕理清言
縱使樵蘇斂平生誼亦尊

答周農父見訪

寒色動平楚愴然臻遠心
吾生何曠野之子亦中林
屢閱秋花響樽延月露深
永言向終古爲一罷行吟

相媚此山阿山空鳴女蘿
水閒魚悅藻風止鵲恬柯
叔黨樵蘇輟高陽麴蘖和
陶然偕作達詎屑衍勞歌

小春海門社集得中字

薄言除晚徑撰酌藉來同
浩露接修坂寒林栖遠風
人遵鴻漸地

月吐鵲聲中賴有清言在山樽未遣空

喜楊孝廉幼麟見過即送其南州訪舊

蓬門霜篠動君與破荒烟整罷玄亭艸遙尋白社蓮情開洲渚色
跡寄雁鴻天去夢隨明月應窺榻久懸

袁公寥見過感賦時正銜觀察公恤因下淮南白其勞狀

君舟自天際寒載雨湖霜九晚資生拙孤琴寫慟長開吟林月秀
質夢澤蘭香何事隨江雁煙帆又獨翔

送方爾止白下徵文

龍眠堪諷雪掛席欲何之一閱冰霜路遙徵蘭蕙詞鐘飄禽定夜
潮廣月開時寂寂江亭上于君倍有思

築室百子山寄馮相國鹿菴

達生易爲趣考室向林泉道識漁樵秦羣憐鳥獸賢瞻蒲天若邇
納稼地何偏攘攘觀人世閒心爲惻然

寒巖窮結構自負隱情深衆驚鮮危事相懽聞野吟雲常通井竈
月不釋陵岑備此幽貞履因風質所欽

寄答三昧師講律楚中卽柬臬使林存峨

楚山浩無極寒翠入江煙蘆影亂歸錫潮音宣定禪傳經何石悟
聽法幾獺賢千里分花至拈茲亦輟然

九畹居然在寧推白社花妙香吹郢雪淨業轉空華鉢暖宜龍蟄
鐘嚴止鵠譁嶺南有耆栢慈蔭及袈裟

存峨嶺南人

光含萬汝遊返寄訊

離居亦何極睇笑入閒心流影接遙月栖琴懷靜岑以君蘭畹格
使我薜烟深寒木春應秀寧孤黃鳥吟

萬卷資生在臨邛未足謀遙知剡谿興已倦木陵遊歲晚情逾貴
煙高夢亦修龍眠吹雪處吟諷日悠悠

送楚友之姑孰訪曹元甫同年

寒江那可涉擊汰復何之月燦西園夜煙綿供奉祠高言開筆籥
幽意質芳籬遙想琴樽會余情亦已移

三戶今如此斯文爾不羣力圖荒大澤道未喪靈芬吹影多危調
譚天有異聞長歌重進酒敬矣袂將分

郊居夜酌張損之

野心無所與晚步向田原寓目山何靄招禽烟遂繁村舂延月夕
室火永農言敵此高閒意須君罄一樽

望龍山憶宗白南詢

遙辨鐘喧處林閒雲滿門留烟施寒鳥護戒與山猿月憶江湖廣
花將朔雪繁禪心自無着予思亦何存

倪資生過訪郊居止宿夜酌

悠悠十年別相見鬢增絲顧我虎兕野復當風雪時薪烟綿土屋
荒雨滴山籬賴有樽中物爲申寒歲期

笑質平生尙浮沉指顧間觀心如古雪栖興此寒山跡喜孤雲并
名矜石戶閒惟君種芳樹荒宅一分顏

資生令嗣孝廉予從甥也

九日病起得方侍御孩未書賦答

病起瞻園列始知秋氣深女霜嬌晚葉蟲月汎孤琴棄世慵頭責
端居謝足音所思小山桂相保共長林

秋色來何際江雲陰遠天楚臣歌自苦宣室問誰先暮雁平沙月
延烏晚樹烟人生幾叢菊相憶乃悽然

寄懷同年王參漢分臬台州

故人爲政地旌節擁標霞結襪動嵐彩鳴琴喧瀑花雁歸春有序
鯨貼海無譁何必清源曲悠悠遞始嘉
幔亭張樂地傳說宴會孫眷此名山藥能無祖跡存蕙蘭寧詎歇
蔚薈氣空繁擬棗桃花飯從君細討論

喜湯爾胄見訪卽送其還宣城應試

春星繁若雨燈火復江村遙快高人集深憐古誼存桴情通廣沙
珮旨約閒蓀更略樵蘇跡清言靜勿喧

敬亭花且發歸及唱新鸞芳艸自生處春烟何限情靈香吹澤氣
壯雨集潮聲好整雲龍策家風藉爾榮

歲晏懷止水兼訂春晤

鐘聲度遙雪知子定方初歲序忽焉盡禪心何所餘盈虛信潮月
豐儉察寒蔬余亦懷芳艸春當禮誦居

歲晏同程搏仲村居夜酌感賦

涼月起疎竹悠然土屋明喧風羣鳥息媚酒一鐙清履道持寒歲
觀時發古情各銜冰雪思期不昧平生

春望蛟臺有懷聖羽廬居

晴雲闕岫色想見紫芝廬觸物定臻嘆懷恩難輟書巢音傳乳雀
籟實薦春魚俯仰南陔下知君思有餘

薄遊成小泊寄夢入江花若有芳蘅意翻疑鳬鴈譁琴樽御良夜
星月衛浮家因笑乘槎客勞勞水一涯

門人吳孝生家于九子知余泊秋浦來會賦贈

知君居九子境與世人分夜諷山燈漾春遊礪藥紛飲克窺井下
乳鶴切林聞何日追烟杖遺身禮白雲

春江浮野艇小泊亦何閒對此一樽酒悠然無盡山多君芳艸意
尋我浪鳬間遂討青蓮勝煙昏未遣還

舟中望大龍懷白瑕仲昆季

寒雨竟遙夜空洲烟火遲山中枕芳艸遂動故人思橘服寧遺頌
微登盍苦饑石湖春水活好爲展烟絲

莽莽黃巾亂軍書達里門何途偶麋鹿未忍語雞豚野靜三星皎
雲停八表昏誠哉天運及沉飲復何論

送蔣子卿遊匡廬

匡嶽春烟外看君採藥行遙筇分鶴路高枕向猿聲山鬼牽蘿笑
巢僧降樹迎何殊三徑裏二仲接平生

水田循梵服塵土陋華簪獨往誰能繫非君無此心千峯青且至
二月雪猶深但遇悠然處書其報竹林

春雨坐江閣聞光黃警感懷寄木公密緯

江雨繁無次春陰貫薜蘿閒知芳艸至漸警語禽多澤氣滋青甸
沙光素白波遙思流目際君亦奈情何

秋晨過訪谷語不值

靜者復奚適雲光閒陰門自嫌筇竹步爲亂蘚花痕翻葉鳥長戲
啼蔬蟲不繁君歸山月出寂對亦何喧

與李德林酌感舊

明燈坐高館與子靜銜觴良話吐非一離憂憶更長禽喧林月至
魚戲水星翔眞意殊堪領悠然命古狂

竹林礚礚日迴首尙悠然寒雨寄春樹昏煙生野田余方投紱久
君亦考槃偏賴有觴中聖逍遙共暮年

佩園坐雨偶成

春園集繁雨靜氣直兼秋塵雜遂無侮高閒聊可謀綠池蒲脉動
青嶼竹光幽坐此銜觴聖饑劬藉爾瘳

春陰同聖羽价人五一慧玉喬伯集園中得樽字

林陰若微雨遂覺綠光繁此地延羣益悠然盡一樽風恬花氣定
蘿警鶴聲翻坐對無言處彌令真意存

懷趙又漢久客金斗

坐臥入春艸于君倍有思客當歸雁路吟及落花時露藥分林吐
山蘿蔭戶垂石蓮秋月好應踐讀書期

酌次魯十賚閣

艸閣晴香裏花繁君適來有懷何契闊于此且徘徊簷柳青難忍

江峯碧盡開好將寒靜意閱世向深杯

春晚郊居范子明自桐來同价人五一過訪時雨適降欣賦

茲作

野閣枕松翠寒開雲滿林情真逾狎俗務簡薄從心花雜山厨飯
蘿銜石戶琴因君詢古處微激楚蘭吟

好雨連昏旦農情幸爾酬風泉聲並合艸木性俱柔山氣清無惑
村春晚自流于茲懷靜正野酌共悠悠

大方移酌同价人五一前之弟觴咏盡日

山居方首夏物感亦何深夢忍釋農事聞難給鳥音遙樽香薜路
清論洩松岑復整閒吟步池光照野心

琴書酬耳目好我遂忘歸烟術紛將夕籬山青且微盡茲林酌興
彌側世情非好識松根路還來共探薇

山居雨中喜鄧簡之見過閱其近作卽送之渡秋浦應試

千峯翔雨氣君至歷何雲試省身心際無非青翠氛傳藝永良話
槌磬響高文爲警山猿嘯方知達夜分

江鄉逢首夏魚笋競茲時獨自尋巖戶相延摘露葵薄陳古人意
聊與野雲窺惜便違芳艸烟帆掣遠思

巖松咏陶公詩而賦也

艸木何繁長青松如是閒飛花香谷口飲翠下簷間懷此雨中勢
居然秋後山谿風生日夕清響爲君還

同張若仲林六長家傳八兄青靄居聽雨

靈雨能時沛中和澤並敦兼收雷電用不市稻粱恩終夜猶鳴竹
高峯自閉門與君觀此夕眎聽亦何尊

五日喜聖羽喬伯至山

青林無解葉客至盍聞聲未有竹風度亦令幽鳥鳴喧烟飛渡日
空翠禮山情何待交馨語君身即杜蘅

東薪南澗底煮石薄爲炊聊則高人意羞陳末俗悲竹雲千頃漾
松月一峯危此際歌山鬼靈均定不疑

山夜

眞機滿山夜梵止艸蟲鳴即境已忘辨觀心無可清和琴風葉響
稟月石泉明祇覺雲巖下損啼細細生

從平等菴還省觀

身隱欲何文枯閒視野雲難忘城郭思遂與梵鐘分礪藥香猶綰
谿篁翠尙紛還傾百花露聊一澣中裙

郊居樹下偶成

幽居何有夏縛樹與清陰尙悟初春日行吟卽此林土暄初坼蕙
烟弱未開禽復此朱明屆薰風蕩葛襟

用韻答蔣子卿見訪石巢

煩暑交蒙慮因君鏡太清悠然良話吐何異石泉鳴潛藻魚爭躍

巢松鶴亦迎籬根指微綠還悟菊苗生

藤陰銜石戶難許世人尋有嫋綴芳艸令予彈素琴古懷凝嶽雪
靈語掩鐘音今夕柴荆月爲君碧更深

喜湯爾胄見過

桐陰方匝戶詞客復何來新稻熟堪飯幽荷香可裁翟門無駮雀
陶令有恬杯坐閱江南暮千峯碧盡開

寄姚吏部石嶺白下

艸閣飲江色馮之開遠情暮山通鳥路高樹共蟬聲映笏千峯翠
酬琴片月清思君讀書處吏散夕鴉鳴

依韻酬趙又漢雨中見懷兼約過飲

旅吟香積雪何以喻高寒鶴語恬宵月鵬翻怒海濶曙星開霧谷
綺氣被雲巒復共燈前酌椒花咏詎闌

送三昧律師之五臺

祖林懷寶月萬里謁文殊古鉢潛攜柏秋航正有蘆律香薰汝鴈
梵貝出飛狐一演清涼法春山望衲珠

趙芝庭改官南使曹訊之

海月照秋樹微風吹夕涼故人官建業逸咏想滄浪身卽松篁翠
衙團橘柚香悠然高枕處何屑較羲皇

屢欲浮烟艇其如刈穫何緣坡瓜蒂熟被圃菊苗多秋市魚蝦濫
山厨麴蘖和誰期飛寶璧明月映荒蘿

訪鄭公露著夷土異書于三祖寺

寺乃予少
讀書處

古寺通秋艸從君獵異書文章逼蝌蚪箋釋到蟲魚怪軼齊諧上
圖開禹貢餘因之謝鳩鷺夢逐日南車

總卅于斯刹呬唔徹曙鐘戲翻鈴際鵠狂揭鉢中龍電哂流光疾
霜驚點鬢濃秋陰覆奇字還記舊時松

九日薄暮泊汀口

憺憺循序時聊存野菊心悠然照秋水殊勝集長林孤燭延宵酌
幽香溢露襟銜情向終古爲一泄行吟
格盡壺觴累身心薄作閒跡隨秋燕泥吟與艸蟲鬬氣白遙徵汐
霞青靜數山因嗤塵世裏舉俗費躋攀

雨中舟行

暄鬱渾無序秋懷不自明食茲涼雨力一洗遠江情眺聽將安着
山川若始生晚香感遺播攀采欲何成
一氣兼天水孤帆若夢翔偶于開圻處岸渚洩青蒼形骸緣俱盡
詩書慮亦荒廓然無念際聊得似空王

蔣吾翮移樽同謝莫京徐慶卿正之弟賦

寒雨及初霽陰晴俱閉門蒸爇炊宿火爆藥就朝嗽室邇雞豚穆
厨荒棗栗尊所欣塵外侶能不格芳樽

深酌懷千古林賢達可追定推茲會彥爲有世人疑嚴語貪霜夜

清機省竹吹成連觀海思對爾已情移

答清流令萬青丘書

青丘以皖司訓遷令

十室千峰裏閒琴正可鳴溪漁喧夜火水碓滿村聲襁負山猿至
絃歌蛋戶清傳來舊綿葢彌式魯諸生

秋夕平等菴賦得山空月色深

香臺鐘定後羣動肅秋林視聽壹歸月幽喧莫辨心影開潭底藻
曙襲葉中禽是際山阿客誰堪薜荔吟

月夜石巢宿靈公故房感舊

山月弄孤明雨餘山氣清洗心眷花露轉法與泉聲竹晦翻經色
苔延徙藥情思君示寂處秋壑艸霜生

長子叔黃梅溪閣成同白瑕仲前之弟夜集

考室枕高煙幽棲此地偏暄巖覆秋葉媚壑滴春泉屨斂山鐘後
杯開嶠月前今宵溪閣夢應降竹林賢

邀瑕仲長子叔前之弟過百子山別業

落木領寒序雲峯青可登湖霜飲殘芰野燒入胡繩先月啼猿至
將煙宿鳥馮山樽招衆嫖不醉欲何能

三昧律師過訪感舊賦

師住錫東林寺予雨止禪房信宿後開戒
衡嶽廣陵茲來江上距前期十五年矣

山燈照秋雨信宿領清歡與子過谿笑別來行路難披雲衡嶠衲
釣雪廣陵竿復此坐池月蓮香白未殘

秋夜泊燕子磯月中同吳仲立周公穆坐亭子上遲曹元甫
不至

不夜江天月秋聲積氣中攀巖喧暗艸弄汐察歸風警露禽難定
啼沙雁不窮祇餘虛白在眺聽入鴻濛

佳人期未至宛在此亭孤夜定秋何際潮寬月欲無寒情牽宿莽
高詠響菰蒲子復誰能遣青山有繫桴

同虞來初馮猶龍潘國美彭天錫登北固甘露寺

莫禦馮高意同人況復臨雲霞鄰海色鴻雁赴霜心川氣飲殘日
天風侮定林無嫌誦居淺暝月已蕭森

徐南高同年招飲董刺史里淳張懷我孝廉令嗣于鳳皇臺
覽古感舊欣慨交集爰賦斯作

野酌就春艸班荆坐不更長離復何逝臺竹爾孤生酒碧林陰厚
峰青夕照明應憐楚歌客不共此時情

送王龍光遊大梁

石城聽班馬君去客夷門風絮殘春路春燈旅夜村烏程爭暮蝶
艸色媚晴原爲問牛羊道還銜幾處恩

泊魯江同殷徵卿程搏仲夜酌

客思原無際春洲綠更荒魚苗沿岸罾蠶婦滿提桑溪艸吹香暗
檣燈照雨涼孤蹤藉朋好小酌野情長

東遊旋舟次懷宗白讀書山中

春林禪誦處壁影復誰羣
花亂香潭水龍馴戀鉢雲
孤峰超夢界幽磬闕靈聞
賴有深江月空明得似君

江鷗兼嶠鶴莫適與親疎
偶逐桃花水因詢漁父居
三山延海霧六代響春鋤
陳跡無遺覽雲林共枕書

柬銅陵崔明府滄浪

化國俗無煩叱歌江上村
雷聲動菱澤花霧接柴門
訟閭簷禽乳藟貧櫪馬喧
遙看九子色飛翠集琴軒

雨霽春江路輕帆入太清
林聲何睨皖川氣亦和平
野靜犢長臥磯寬鷺不爭
李侯秋浦句今日爲君賡

人日寄鄭公露客池陽文選閣

春懷寄何許君共九峯雲
芳意含初蕙微吟在夕曛
花齊庾嶺發月向海珠分
知爾彈魚暇嚴搜六代文

同越僉憲卓凡馬中丞瑤艸夜酌

雨餘開艸色握手擎春煙戰哭歌罵地烽颺舞蝶前心隨花事謝
肘任柳絲懸靜對兵厨酒時危覺汝賢

詎敢關時務安危亦有軀憂天知共哂謀野定非愚蒟醬誰輸版
龍媒未獻圖從君頻剪燭雄辯不能枯

范總憲質公雨中見過感舊

窮巷綿春雨高軒念屢過憂時心共赤失路鬢先皤良話更紅燭
深杯眷碧蘿瀾園回首地黃鳥續悲歌

瀾園質公家園名

幾年春艸際星氣隔陳荀高枕千峯侍移家四壁新應門多情雀
蔽肝詎遺鶚未敢呼仁祖知君顓亦塵

再同卓凡集瑤艸水亭

水煙將柳色一氣綠光浮坐久領禽語始知非夢遊星繁堪素燭
花靜直臻秋不是研今古清宵詎可酬

小飲流長話身心此會尊崩鳶憐瘴海貢馬紀花門所歷何非夢
惟閒不負樽坐深占夜氣寒靜亦無痕

驚峯寺過譚遠韵寓賦

對君如夙好夢久達寒河所寓向古寺故園芳艸多禽言響新樹
花水曳微波此際偕吟眺悠悠意若何
琴樽無淺興况復值危時曠野既相率停雲深可思春星動魚罾
艸露集珠絲遙念山阿客燃薪讀楚詞

寓李孔凡水閣賦贈

高士青蓮後秦淮隱釣竿褰裳向花發授館及春寒煙盡山難寐
潮通月並寬閒來春白石廡下薄爲歡

與君閒閱世今古一桑田坐此落花下無如飲酒賢緯蕭共牛語
種柳待鶯遷更採秋籬菊相從年復年

旅懷感呈南高岡卿居廬

愁思如芳艸春來日日生煙花迷令節烽火掩孤城鄉夢啼鴛斷
微生旅燕輕遙憐故林竹新碧欲何成

谷蘭香可把良友惜居廬健戶枕春艸明燈開梵書庭長迎弔鶴
夢亦泣臯魚始悟遲環召知君重割裾

春雨旅懷柬葉少宰以冲吳廷尉玉華兩先生

江雨綿無輟閒知春艸深攬衣集秋氣隱几類孤岑花藥恬開步
琴書靜侍吟治城際芳月幸植歲寒心

曠野欣相率朝饑恥負薪靜銜彭澤酒平眎葛天民魚霧馮潮吐
禽烟逐樹新時情正多感不獨戒黃巾

過忘所精舍

春艸綠茫茫因風聞戒香偶尋雨花跡閒至遠公房領梵松機著
開琴月旨長無言禮空翠更滌竹林狂

至半峯菴訪雪照不值

孤錫颺何地松花香飲門霽禽語初善幽枯境彌尊無復琴書擾
兼收鐘磬喧與君相見際潭月寫虛痕

過青山禮李供奉先生墓田

供奉鯨何適青山有墓田懷情與誰質作禮向高煙辭樹花爭舞
沿溪柳自懸悠悠馮眺處村酒碧香鮮

孤生同放黜何異夜郎西自笑如蓬轉思君聞鳥啼艸繁煙詎弱
山暝葉初齊野唱來樵牧予情更爾迷

宮錦君王賜荒碑逐客魂窮通聊與叩山水寂何言才足勝時忌
文何忝代尊椒醕兼麥飯一爲展松門

玄暉流寓後之子美洵稀艸木空香在牛羊夕照微銜觴山月侍
搖筆海烟飛今日青峯裏猿聲日夜歸

從青山曉發至黃池逢式谷時生繩先奔予旅酌

雲臥起長晏茲行露未收一移名利擾爲作友朋謀蓼旨蟲難避

林音鳥自求荆高遺酒在擊筑共銷愁

黃池公館夜雨有懷方肅之四十初度肅之時在宛陵爲其
四兄告急

小雨鳴深綠清機寓所聞思君敬亭夢茲夕與損分摘露滋棠色
推煙衛雁羣寧虞芳艸路天馬跡紛紛

不復知揆覽孤辰轉向隅冀廻鷹隼翮一慰鵲鵲呼臺潤瓜長衍
池隄艸未枯期君攜廣被高枕勝蓬壺

賦慰方時生

避地將何適風花相共飛爲敦友生誼未忍寸心違粟次禽言苦
蘆中魚服微橐籥擬何具還探賸山薇

湯爾胄徐宜生俞其章詹在右攜樽汎宛谿相送

烟草微何際舟行綠漸開還聽谿路響良友復能來夏淺螢初兆
漁恬鷺不猜清樽演華月放溜遂忘廻

病中鄭公露過論詩

高枕荳花雨孤鶯囀竹扉與君清論展更覺世情違
綠酒樽中滿黃精巖下肥相攜共茗粥且爲解絺衣

雲海思茫茫高歌對此觴請觀時輩習誰獲古人狂
春澗泉聲翠秋潭月氣香見聞參此際爲與聽滄浪

病中高吏部龍門見存感賦

空園羅灌木高枕向蟬聲自勸樽中酒閒觀世上名
水香菰米熟山暖橘花生努力持農圃猶慙負聖明

蓬門枉知己忍學野鷗飛力疾軀彌善譚言俗所稀
野苔延蛤路深艸曳牛衣笑指山籬菊隣秋葉漸肥

世情何處識江上萬峯雲潮汐復何意朝昏徒自紛
雞聲紅藥響猿嘯綠谿聞終欲辭家去長攜晨肇羣

雨後池上坐月有懷薛比部諧孟

屏居成獨坐池水與心清林月自然至塵機何處生露涼集蟲語
風善定螢情夜境渾無際寧論身外名

謁謁雲停處思君朝夕閒孤樽持白雨高諷給青山晴葉臻蟬響
風林振鶴顏還期浮野月秋艇撥潺湲

雨中同葉以冲先生雪照上人坐弘濟江閣

盡日江天雨彌疏物外情意中諸嶂在影際一帆生潮廣從魚鰲
沙閒浪鷺爭真機集恬眺玄對亦何名

坐燕磯亭子再賦呈以冲先生

披襟對雲沙身世入青蒼飛鳥復何向孤帆相與翔清言給松篠
閒眺貼菰蔣迴視栖鐘地空煙已混茫

肅此孤亭抱空江颯有聲停雲終古思浮海此時情領雨龍行苦
吞沙鷁路平晚航遲霽月同擬濯吾纓

坐法雨上人澄觀閣

結構循雲壁無妨石竹陰不知空翠裏何處海潮音
遂偶孤霞至來參靜者心江身現虛白如月照幽林

帆影何飄忽青山爾穆如沙田觀戲鶴水霧察飛魚
花衆離難衛蘿沉磬與疏白蓮有榮落何羨遠公廬

立秋前一夕坐栖霞方丈

客心元易感落葉不須期況是先秋夜悠然鐘定時
露涼螢悅艸月晶鵲翻枝是際空山裏能堪薜荔思

坐慧汐居贈觀一

禪室臨江埠自然軒戶涼蒲喧聞蛤誦蓼盛覺鷗香
海月潛栖鉢秋潮每觸牀暫來分茗粥已識道心長

杜于皇至天界精舍相訪

遺身入香界自負世情違何意秋花外君來叩竹扉
人閒同樹定話止到螢飛泯泯松根路無妨帶月歸

酌張問夫

屏居齊堞蟄龍性頗諳時菊外山長澹蘆中服自奇深烟趨鳥候
寒雨遞觴資豈遽傷窮節妍暄意可遲

詠懷堂詩集

卷之三終

詠懷堂詩集

卷四

石渠阮大鍼集之著

南海鄭 露公露較

七言律

除夕大雷雨同徐慶卿曹肅應齊价人周子久張損之守歲

詠懷堂賦

雷電誰明時序心先春解作擾長林豈緣天帝謹無度應哂山龍
蟄未深野甸虛徐延艸色暄枝次第嚙禽音江田薄治鋤犁後酌
酒將君賦蕩陰

甲戌元旦

耆舊何非萬曆民龍飛輯瑞憶茲辰四門共集變龍履九服無聞
甲馬塵世事頓驚桑海燥春謀漸與黍疇親陶然自炙屠蘇酒笑

閱梅花歲歲新

青冥閣

昔王元美先生舟過江上指大龍曰蓬蓬勃勃海上三神山乎青冥中有人未可時代計也今年入山山僧建閣翠微中問名余因感先生斯言而以青冥題之

蓬蓬海嶽並真形指點曾聞動客星淨業倘能師白社高文敢曰破青冥吳門練影難窮辨楚澤蘭香未解靈時代雖殊精魄在筵簞一爲報東溟

泊李陽河

春陰野泊念江寒紅燭青簾照鷓鴣冠聽雨漸知農務動乘桴聊取酒程寬燈餘伐鼓人何靜觴止鳴鷄醉已安霽視羣星尙無恙少微歷歷挂漁竿

舟中雨夜懷謫居友人

孤帆細雨靜依依極目春洲綠尙微節物又從新柳換謫居寧有
幾人歸王孫祠畔叢魚戲歌舞樓中野雀飛往事旅情君自見蒸
釀秫莫相違

寄懷劉敬仲司空

與君執戟向塵沙官舍蕭疎接暮鴉天祿閣吹藜杖火步兵廚勝
酒胡家春鑣競踏高梁艸秋艇輕穿淨業花屈指廿年如夢境青
青雙鬢已增華

桃花春漲漾晴霓平奠勛名刻水犀何藉從官沉白璧恭聞上帝
予玄圭山青艸閣容高枕野綠閒疇好杖藜何日任城樓上酒從
君沉飲醉如泥

仲春七日同韓姬命曹肅應張損之方聖羽齊价人彭五一
劉爾敬集劉慧玉宅

荷鋪甯須紹古狂竹林清夜與傳觴澤居人飲春雲氣彥會言蒸

蕙艸香露白鳴雞招舞劇蒿青飛鷺詠懷長醉分何必攜餘興高
柳垂藤切短墻

寄懷崔銅陵滄浪

九子山雲晴自生虛徐江上簷芳蘅花村到處有人住訟閣閒來
惟鳥鳴石戶燈青煩夜織春疇烟碧起深耕何當更汎芙蓉路瀨
靜沙寒聽濯纓

喜史蠡卿請告歸廣陵江舟小酌

南楚殷須坐鎮才菊松引興賦歸來江鄉麥與魚無恙春嶠人同
鴈並迴鉅鋤畢探文藻勝春陵未釋繭絲哀如今芳艸容高枕且
望蕪城罄一杯

閩爲余使車所至地讀汪大年諸詩重若臥遊遂賦此

解薜曾乘閩嶠軒至今清夢武夷繁爲吟花縣趨庭句似引灘聲
到枕喧山靜切簷聞乳鶴海蒸馮几閱翔鯤何當更漉荒廚酒石

蛛蛛官細討論

初夏送損之還江東期以秋至

蓴鱸曾不待秋風歸路芳蘅綠未窮
百子鶯繁山夢遠長千鐘定
月光同琴聲幾夜彈湘水帆影遙天破碧空爲語霜籬叢菊發遲
君高步睇飛鴻

山居雨中張若仲林六長先後至

雲林次第集羣賢招隱何如此地偏
夏淺涼隨新雨至吟悵人在
夜損先無言山磬傳空翠晏坐松燈照石泉此際塵機定何涉將
君清夢各泠然

山中五日示若仲六長

雲旗終古自逶迤歌到離騷敢妄悲
漁榜祇循巫覡俗文壇徒鬻
蕙蘭詞山當積雨收虹後人際空香飲露時內美于斯微可驗獨
招山鬼薦江籬

喜王使君梅和銜命移鎮皖上

莽莽軍書七澤來一時風鶴起蒿萊關中自轉當時粟開府無如
叔子才平野不妨驅犢出高臺曾此射蛟迴欣傳竹馬喧江路幕
府無聞畫角哀

孤臣胥靡敢論兵陰雨難弛桑土情軍府自移龍虎節江濤遂接
鸛鵒聲長風倚樹人何壯夜火量沙課始驚征虜雅歌知不減潢
池秋艸近將生

細雨春洲感袂岐袞衣欣即咏來思寇恂轍動蒼生臥定遠功成
白髮垂楊柳薰風鈴外暖梅花香雪簫中吹海門月吐千峯靜大
斗歡陳朱鷺辭

遺身近復入蘼蕪簞食蕭條禮法枯一壑途窮安阮籍二天江左
仗夷吾野心不棄漁樵侶羸疾聊資藥餌扶飯罷牛歌中夜起車
門叩角待傳呼

寄韓太史求仲

西子湖花秋正繁聞君于此託朝昏
能將賜隱齊狂客不羨摛詞
近至尊數載碧山懸鳥路長歌白石奉牛樽
何時得永漁樵話露
履煙竿道亦存

送汪六御入覲還靈山

薰風楊柳散晴烟遙望仙鳬向海天
搖峒瞻蒲還勸檣珠淵飲馬
亦投錢輶鉤聲裏花迎鳥薜荔香中月暎絃
縱使聖朝無闕補天
書好爲夕郎懸

寄楊中丞文弱塞上

榆關有爾繕泥丸左袵寧虞到鵬冠
羽獵絲來推賦手樓船新復
隸衙官帳前調馬春蕪細酒後呼鷹磧
艸寬相憶不須馮夢路盧
龍秋月值漁竿

文酒長懷邸舍時楸枰世事詎勝悲
短襦中夜陳牛飯破硯秋窗

註楚辭朱鷺定知油幕沸紫鱗聊爲布帆私桃花源水渾無恙羨爾功成有釣絲

萬世甫至訊楊修齡先生

桃花源水接煙波聞有玄亭領嘯歌達士聲名存酒德聖朝勛業滿漁簑青山幸不嫌瓢笠碧月偏能選薜蘿散髮與君呼犢語秋田細艸近如何

謝方侍御崧生書訊卽送其北行報命

大東驛路散晴煙攬轡趨朝儼若僊蟲館栖琴多白露鷹風鳴佩入青天雲沙萬騎弦長控水霧三星留獨懸安攘定知煩石畫先陳民瘼聖人前

寄懷吳南寧孝先

嶺樹江花結夢長羨君冰譽滿炎荒一官遠寄霜鴻外合郡秋聞露橘香稅薄鵝毛常代闕徭馴蠶女不爭桑遙知齋閣無長物椰

酒聊堪與客嘗

送程霖宇南粵遊

蓼香荻露片帆輕君向南天越鴈程錦荔秋深房久熟黃茅雨後
瘴全清裝連霍納春煙吐手擎珊瑚海霧生安得九夷偕杖履踏
歌蠻舞聽蘆笙

酌姚純甫時將省心甫銓部于南署

柴門秋樹掛斜陽莞爾聊持犢鼻張自喜種瓜綿野圃不嫌釣棗
過隣牆黃雞羣啄山籬黍紫蟹將銜石岸霜酒熟更逢良友至沉
冥彌覺發吾狂

芙蓉香露及秋清掛席將爲采涉行江近嘉魚隨市得官閒修竹
繞衙生危時更悟莢樽旨中歲猶懷布被情古處如君兄弟少倍
從風雨念雞鳴

寄懷董玄宰宗伯予甲子乞身先生以詩贈行今十年始答

也

清時疏傅卷高蹤十資新膺九節筇祖帳軒真乘野鶴虞絃目亦
送飛鴻故侯瓜蔓青門笠開士蓮花白社鐘爲報野心難割據總
持近已屬夔龍

駐顏何藉餌丹砂手種頰松自有霞獨對東籬閒採菊任傳北闕
廣宣麻霜盤侍史調鱸膾秋艇漁僮捕藕花三泖朝昏連坐臥寧
煩墨勅動官家

講幄文書競繞身禁臠終不易江蓴好持船子魚中梵一澣元規
馬上塵松籟平分弘景閣檀根應是輞川人五峯秋月聞笙鶴綠
野羊求有上真

紫禁烟花拜夕郎天人遙接祕書香宮磚立處衣長白帳餞詩來
絹已黃艸際飯牛襦自短蒿間飛鷺咏空長何期進履窺園日盡
醉樽前學楚狂

月下飲鄴湛若感時有賦

清宵小飲憺無譁
聽爾玄言曳海霞
夜久禽聲翻月樹
露涼蟲響抱秋花
羽書艸澤傳新嘯
羯鼓漁陽警暮撾
惟有鱸魚甚無忘
鱗鱗爭媵石門槎

園中種菊聞雲中虜警

虜騎燕雲報合圍
刺閨烽火照龍旂
垂魚卿士帷中策
射虎將軍閫外威
戶籍卽傳編老上
伶官未可黜鮮卑
山農刈罷秋田黍
不醉黃花何所爲

秋登十三叔中江樓

詠懷久擅竹林幽
作達還開江上樓
露白汀沙難辨月
潮青島嶼各臻秋
春流魚湧桃花沫
彥集人依杜若洲
倍喜聖時漁稅薄
儘容載酒狎輕鷗

寄答陳太史雪灘卽送其北行

繁露空香飲夢深蛾眉移月照秋林平津賓滿傳投轄正字名高
莫碎琴墨勅已催行李色碧山蹙釋採芝心遙知侍酒堯樽日不
但西南暝傳霖

秋浦舟中感時似子卿

星枝烏鵲繞南天辛苦無衣好共憐旅泊不堪山葉降秋吟寧讓
艸蟲先人情似厭葵倫腐時論羣推盜賊賢予亦與君肖巾幗短
篷私泣對江烟

送何青山相國再起還朝

西疇歲月儼東山瞻顧蒼生未許閒遂有起居關帝夢再瞻劍履
押仙班心恬綸閣猶莘渭道泰卿雲蔭孔顏好抱懶殘煨芋火鸞
刀一爨玉鉉間

清霜皎月映蒲輪正值陽廻玉琯新梅鼎調丹資聖手楓宸衣白
觀天民堯陔解作人龍雨禹貢咸銷士馬塵廿四考成還未髦青

山來問赤松鱗

立秋日送吳明府聞生南旋

一葉流風秋序臨能禁黃鸝動歸音妬人子自矜高下畏壘思何
異古今石竹春留盤馬跡澤蘭香入抱琴心絲來海燥須臾事莫
就湘纍叩陸沉
江天秋水澹無倪傲吏孤琴恣所之松栢不凋寒更見芙蓉堪采
涉奚疑習池此日沾微罪峴首誰人剪去思向後鯉湖雲臥處五
株門柳亦絲絲

焦山

東南浩劫此虛無欲抗朝宗島勢孤一勺人天窮眺聽六時潮汐
有榮枯林深山鬼招難見壑靜秋龍睡可呼却笑焦君名未避空
煩指點到寒蕪

金山

積氣難名天地心古今無限此登臨
珠間星影長開島鵬下雲光
欲飲林滄海幾還秦帝藥洞庭不隔楚妃吟
憑高一奏成連旨江
月江烟次第深

方孩未禮普陀回至鑾江相晤感賦

遙禮青蓮汎島隅鵬雲蜃雨片桴俱香臺密結金仙印
碧海單提明月珠煙火已從雲汐判身心都向水天無
君歸應笑長生客桂
樹婆娑老一壺

送望江朱侯擢守海州

秋清鳬影動菰蒲峴首碑看勒小孤數載菊松望彭澤
如今釜餽接萊蕪風雲淮海儀神雀煙雨家山夢鷓鴣
臥治定須同內史閒
調五馬飲春湖

晤陳駕部劍華感賦

道直誰能避輶軻青山無恙奈貧何
柴桑杯蟻長酣菊廷尉門禽

不畏羅甌底清塵標儉德車前白石起勞歌與君笑閱人間世
兩衝風蕩九河

蕪關謝王水部季重招飲

季重舊令當塗

堯時天路未高荒執戟何嫌再作郎從此斗杓開象緯遽令英簜
有文章客帆寒載家谿雪關樹香連舊地棠更具阿戎玄尚在竹
林重與紹清狂

霜露淒其歸趣濃逢君何復恨途窮鯨飛怒掣無滄海嶽立蒼寒
表華嵩宮錦再披流古月江帆四集納條風杯前靜察潮生路桃
葉春深夢許通

荻港楊守戎子儀移酌舟中

霜鈴月戟靖江關樽酒還來慰旅顏孤棹影開冰雪路殘年跡滯
鴈鴻間筆從投後花逾盛字卽行間問豈閒日暮潮聲如雪湧看
君麾羽向胡山

燈夕阻風蕪湖舟中口占似程搏仲家衡之兄

莫向青山憶舊廬
扁舟吟笑幸無虛
春帆着處依鐙火
江鴈何程畏簡書
月照花林如積雪
潮生沙埠有鳴魚
相歡共醉村旗酒
且傍香籬問索居

同俞駕部容自徐岡卿南高赴徐侍御孟麟招感舊

無恙春星帶薜蘿
與君盡醉復高歌
百年世事等殘局
一飯君恩有荷簑
青甸香蒸遊屐艸
紅橋風冒酒船波
還思杞國同憂日
拳石空勞障九河

述懷答友人

雲駟虛無江上臺
薜蘿香動有朋來
名銷更覺琴書逸
道在能持稼穡衰
非國有天收瘴雨
罪言何夢托寒灰
與君笑盡手中酒
池上藕花閒自開

謝李臨淮玄素見枉不值

西第春烟接漢宮
棘門新柳散條風
石花飲羽真成虎
竹素抽毫盡是虹
題鳳青蘿人自遠
飯牛白石調逾窮
何時獵騎喧芳艸
橐筆從君賦小戎

聞趙侍御二瞻自金焦取道遊西湖賦寄

秋清碧月照菰蘆
露笠煙帆興未孤
盤水自招梅嶼鶴
翔星誰識栢臺烏
長卿徒擁三巴傳
宗炳空懸五嶽圖
獨羨使君情具勝
東南寸景不令逋

憶家大人俶園

坦坦何慙履道居
雲林幽事定無虛
籬間密竹不妨鶴
潭上落花能供魚
安坐高齋閱秋水
客來小圃剪春蔬
猶嫌弘景松風鬧
懶向華陽乞秘書

小閣青蓮佛火光
閒將四大隸空王
繡幢風曳金鈴語
石鼎煙流貝葉香
耕穫恥爲營下瀝
滑稽深欲斥東方
鹿門自踐真人隱
頂

首先窺覺路長

大隱絲來不近名
蕭機玄對澣塵情
據梧盡日曾無夢
動操羣峯各領聲
祝噓不煩鳩刻杖
步虛自駕鶴爲笙
慙予養體眞豚犬
烟火空調禁鼎羹

藹藹南陔自可親
幽源慵爲逐秦人
紫芝好作芳廚饌
白苧爲翻畫棟塵
心淨蓮花容結社
機忘鷗鳥亦歸仁
斑衣似不煩兒舞
醉起登前唱鬱輪

壽方四如五十

雲達羽翮羨冥飛
隱處星辰指少微
紅稻可釀千日酒
碧蘿還勝六銖衣
山空鶴語高烟響
石爛牛歌細艸肥
松菊平生嘉尙在
考槃視履亦何非

送汪涵秋歸淮南兼憶斗樞

君來江上正芳菲
今去淮南雁欲飛
聚散人生如落葉
蒼茫空水

對斜暉青山不隔孤臣夢白日誰憐季女饑爲寄愁心河畔艸年
年春色望中歸

木公從宛應教歸京口小詩送之江上

秋水知予別夢長悠然天際下孤航衣無宛雒風塵色簡是梁園
竹素香時事何途私涕泗江山留冶報文章君歸豈托鱸魚興菊
意楓聲已漸霜

寄答陳南充如疇

秋籬叢菊一思君江上青楓隔暮雲劍闕天孤銘尙壯琴臺花改
賦猶芬雞神自肅祠官典熒道爭銜父老文長物定知非所蓄郛
筒美酒可能分

寄周觀察柱瀛備兵淮海

卜居近已老漁樵閒向秋鴻望赤霄龍節定知生氣象鷗冠殊可
慰蕭條春旗暖色颺河日秋閣寒聲靜海潮近說移軍屯細柳東

方蛇豕更誰驕

吳幼玉六袞禮雲栖還賦壽

塵世桑滄定不疑采山聊可謝朝饑榮分几杖真人賚香滿彫胡
弟子炊湖月能疏心鏡彩毘藍詎向覺花吹歸來更達沉冥旨米
汁秋樽好共持

寄懷林存莪開臬楚中

離居蹤跡托垂綸顏色長從海月親道在冰壺懸鑑地環投滄海
抱珠人靈芬不格筵簞旨荒澤能無篳篥陳更有青山棠樹在年
年花載嶺南春

感懷寄慰田郡伯三峨量移還蜀

峨眉晴雪照歸裝數卷圖書共隱囊縱使世情如灩澦難磨清咏
在滄浪徑開彭澤三秋菊畝列成都百顆桑聖主知君心似水爭
傳水譽滿朝陽

袁公寥自廣陵回雨泊招飲予樂感舊

盡日春江雨不開暮帆遙向廣陵來
寒濤似枕山扉雪埋照猶銜
火樹杯蒼狗浮雲聊共哂白鷗
野水定何猜廿年多少悲歡事
銷在西窗一寸煤

偶讀元次山喻舊部曲詩有感

兵興十載焚戎服嘆哭曾傳樊水陰
退谷樵漁今已老普天士馬
正如林榮光定叶明時兆閨氣
難窺真宰心日暮碧雲修竹裏
空臨梁甫弄春琴

送江菊裳之信州任

海門新柳漾晴沙極目雲帆引鷺霞
湓口潮迴猶帶雪弋陽溪暖
欲蒸花春潭霧白聞魚徙訟閣
峯青絕鳥譁聖代繇來重才子
豈令江總滯天涯

送李煙客林六長下金陵有懷博羅韓夫子

楊柳風恬五兩輕
艣邊桃葉若聞聲
露芬孤嶼啼閒鶴
月印空江舞舊鯨
聖代詩書寬摺撫
農臣耕鑿有經營
君行并閉羊求路
菱舍惟占紫氣生

送洪慧生南行并寄子明爾止

秋林叢桂露香翻
送爾殷勤展一言
熊館誇胡臨羽騎
牛歌乘燧達車門
嘉賓無負笙簧饗
計吏偕知禮樂尊
木末烟平霜滿際
馮高不盡我思存

寄趙侍御芝庭

年來整暇理漁竿
擊鱸撈蝦政自歡
所喜黍疇荒下濕
政將楸局問長安
樽前延酒月長在
籬外映山花未殘
爲托鴻聲報東海
遠遊何日共高冠

謝遲侍御之來招飲黃山閣

東望天波曳紫瀾
峩峩崇岱峙霞端
花香飲鶴蕪城近
海霧吹魚

渤澥寬綿叢自慙無禮數惠文深得罄交歡樽前已燦雷峯月願
托盟心未忍寒

柬錢密緯

北固山前鱸正肥知君撰酌近漁磯煙餘野月全歸艇霜下孤花
不隱扉吾道所須秋黍黍客程寧與海鴻違江峯歷歷青堪數早
晚薰葭片席飛

采石磯同劉爾敬晚酌感賦并柬同志諸子

晴江小泊荻風微拾月乘流有舊磯煙篷似爲歸鳥計波喧頻聽
醉魚飛邊笳羯鼓烽俱莽蠶箔漁苗稅未稀此際野心閒對酒豐
橙澹菊道何非

金陵晤郭侍郎金谿感舊兼送其赴嶺南謫所

十載離居未忍論秋花重對白門樽探薇留得餘生在孤竹彌瞻
大節存黃葉路從湘水濶青山道爲逐臣尊殊方飲啄君恩重雷

雨行看起伏鯤

瑣闌夕拜共爲郎憂國覘君鬢早霜柳下不彫三黜節宣尼何陋
九夷鄉青藤釣酒蠻奴槥花艷編珠峒女裝陸賈金知非所好爲
搜奇塊入詩章

李通侯玄素移樽舟中偕同志賦得秋江晚照

孤航搖曳寄秋花小泊班荆對暮霞樽酒自延殘照色六朝如此
晚歸鴉風搖遠火應難壯波立羣峯各不譁是際客心渺無極鴈
聲何復遞寒沙

與李將軍湛閣對酒

酒碧似分江上峯何知身世成飄蓬幼安東徙笑何地醉尉夜行
安可逢煙渚離離戲田鶴海天歷歷橫秋虹接輿是際楚歌發吾
道稼圃將焉窮

送羅別駕衡臯監督固原兵餉暫還南州

幾載題輿別思牽依依征蓋拂江烟龍沙暮雨搖珠閣僊掌秋雲
映石蓮飛檄虜移山後帳行春人種磧中田金城旦晚條方略宣
室爲君席欲前

冬夜酌杜退思感舊

燈白窗寒雁有聲與君深話十年情霜皋落葉鳴湘水煙陌繁花
簇帝京琴瑟自閑中散調文章還避左徒名樽前對影因相笑短
髮蕭蕭次第生

答梅長公書訊兼送其開府酒泉

秋清蘭畹散餘芬列騎香風繞雁雲三戶已開鉤黨籍五花新領
酒泉軍杯前杏酪聽笳管馬上隄塵掃檄文遙送莫歌重進酒龍
堆元擬策殊勛

秋杪楚友何章長見訪

餘生安敢說行藏逕艸多君與破荒衰鳳有歌聞枳棘孤鴻循影

到池潢茱萸山酌高呼酒橘柚霜盤細薦香更剪秋燈聽落木湘
臣魚腹詠難忘

楚江千里布帆輕巖曲相尋叢桂盟風雨蕭晨無謬管龍蛇大澤
有孤生閣通山氣樽俱翠琴入秋泉響更清此際悠然懷尚足東
山惟爾預沉冥

歲暮予築落成時程禹璜自北歸同幼玉長秀社集得年字
新除荒徑竹林邊朋好琴樽自此偏汐社不愆風雨候歸人更及
雁鴻天庭中藻影能稽月杯裏椒香欲報年落落歲寒忻共保春
舫詎負石門煙

中秋答余谷王

遙峯分月挂江城篠路蘿庭冉冉清高酌直翻叢桂露孤吟聊壓
百蟲聲圍摩石瀨喧秋澗簌葉寒香覆古坪此夕知君情不淺開
琴浮白坐空明

同方潛夫泊弘濟寺潛夫宿澄觀閣柬之

紅蓼青菰暝色深相從漁浦放閒吟夕陽已下江峯翠清梵遙聞
水寺音雨後野螢飄亂艸燈前吹葉響空岑思君高枕蓮花界夢
裏能觀不染心

晚霽同元甫望九子有懷李供奉白

九子青嵐霽不收
寥芳信宿向中洲
布帆豈待鱸魚掛
水幕聊尋海燕儔
春市壚開香飲月
空江烟盡澹淒秋
獨憐供奉虛飄泊
不共清溪此夜舟

喜從祖茲園公解樵川郡歸

閒雲輕席兩悠悠
天際遙歸故國舟
海郡衣冠聞餞鶴
江鄉飲啄幸隣鷗
好風偏與梗香會
佳月寧虞薜影稠
只此東山足礚礚
湘臣何地着離憂

浮雲自古不堪論
初服彌瞻吾道存
艸木賴融軒冕相
人天合讓

鼎彝尊幽心遠渚聞荷發霽日高霞快鳥翻自喜林間備羣從問
奇那得隔朝昏

秋居有懷楊斗樞霍鍾西呂益軒

九河日暮起重陰蒲葦冥冥秋水深如此陸離委長珮一時啼笑
倚孤岑攬茹不掩湘臣淚采葛誰明越婦心欲寄幽香虞道遠空
餘叢橘耀霜林

山阿歲晏孰華予西極將騰徑待車颯颯女蘿啼赤豹鱗鱗秋水
領文魚天高冀野雲終被霜落吳江木更疎我欲何聲酬鳳德蕭
條自接楚狂輿

感時賦慰十三叔并諸兄弟

窈窕秋山青可憐更逢落木下晴川江魚薄腴寒潮水野雀深啼
晚樹煙縱目高臺遲佚女愁吟梁甫有遺篇汨余日月蘆中老招
隱難爲衆嫫先

瑟瑟微風鳴女蘿邀予睨笑彼山阿衣能至哥呼牛語艾不張羅
奈雀何淨露宛從荷屋降幽香誰並竹林多烹雌釀秫深相勞窮
達無如理嘯歌

九日病中感賦

鶻鴂深啼感歲華落英猶繞故年花茱萸不厭人三已橘柚還香
水一涯絕塞風煙無徑路彼都臺笠正繁誇山籬土甌舖牛後起
視秋虹抱晚鴉

采石弔太白先生

煙波是處若爲家鯨影空搖石上華祠像幾人能縮酒英靈終古
自懷沙月當牛渚難爲夜江在天門未可霞山水將君共寒碧幽
通何必薦疏麻

乙亥元旦雨中試筆

雲物空勞太史占江村竟日雨纖廉屠蘇逋老還先酌梅蔬流香

入小檐閱世又憐人事驚明農自許野心恬晴洲早定寧芳侶候
至難令杜芷淹

慵思四十九年非眼底青山興不違松菊未荒彭澤酒枯棹久謝
漢陰機薰風楊柳鶯將轉新水桃花鱖更肥薄俗桑滄寧足哂煙
帆擬向五湖飛

同越卓凡飲馬瑤草水亭聞寇警感賦

避地逾寬物外身相從抱鄴覽烽塵淮流遍飲紅巾馬春墅雙閒
白羽人快集月霞能導酒薄寒花氣轉馮裊狂來擬奏俞兒舞野
曠星高未忍陳

雨中李京兆曉湘招飲秦淮水閣

綠楊吹雨濺芳樽煙艸離離漫水痕避地烏衣尋燕壘開觴白袷
近龍門衷言競吐羅浮雪眉筆堪銷桃葉魂醉後與君偕騁望青
山幸爲六朝存

鵬冠生事感蕭條愁緒寧堪雨共飄寧戚飯牛歌自苦幼安牧豕
路長遙江田畬火春俱輟澤國軍烽夕永銷藉有使君高義在野
人長此託漁樵

旅懷柬何計部蓉菴

烏衣旅食共閒閒小隱鶯聲艸色間聖世甯煩憂赤羽主恩到處
予青山煙深漁屋鷗相狎月靜畊墟犢自還此地捕魚兼釀黍與
君長駐老親顏

寓秦淮與長子叔水閣相對有懷茲園公

何地徜徉無竹林青山宛載六朝心遺身魚服江煙竊努力牛歌
春艸深隔浦共聽花底曲開窗各弄月中琴茲園松菊知無恙醉
後應懷梁甫吟

晤孫銓部意白感舊

治城新柳正鳴鶯握手相看百感生共賦風波人世滿爲憐辛苦

賊中行一官大隱齊黃綺六代方山類削成迴首遂園觴咏地西
京烽火幾時平

遂園乃銓部園

方司成書田見過感賦

研北推君二十年如今雙鬢雪俱牽高車響並鶯聲至清論飛于
柳絮前謝傳墅閒芳艸坼孫弘閣敞晚山妍請從絳帳諸生後問
字來分太乙煙

聖代潢池警未平漁樵夢亦入軍聲夔龍願奏雲天舞鵝鴨長銷
雪夜兵革岸尙容魚網曝麥秋不廢檣車鳴野夫敬枕嚴灘月閒
漱清流咏濯纓

家大人初度謝李戒菴過祝

汎宅聊申菽水歡秦淮碧柳照斑斕似聞黃鶴舞瑤笛更喜白魚
迎釣竿自向源花通飲啄寧煩野竹報平安紫衣不羨逢元發斗
下猶龍氣未闌

移宅城南郭侍御雲機過訪賦此

春深艸樹展清陰
城曲居然軼遠岑
蒿鷄幸能安弱羽
花驄還與浦高音
清飈貫體渾如竹
古雪霏譚不藉琴
有道家風知不改
華簪長抱澹寧心

閒門高柳曳新絲
何必雙柑遠聽鸛
酒碧不離花下甕
山青自至菊間籬
鳴絃欲和松風籟
煮石麤充菽水饑
自食補天公等力
江南無事子山悲

與葉中翰白于感舊賦

蚤歲相從供奉班
如今青鬢點霜顏
金門懶乞侏儒粟
艸屨同探幕府山
牛飯有歌徒自苦
鸞聲不醉且無還
木奴萬樹搖晴綠
鄉夢知君更未閑

送王宮諭崑華北上

薰風堤柳拂平沙
極目雲帆入遠霞
朝列爭來迎赤舄
至尊親與

押黃麻雞神漫飭祠官典葍醬虛通博望槎早晚變龍階羽動鷺
翻一爲舞訾邪

秦淮艸色碧初勻斗酒還來踐隱淪野啄亦招霄鶴至山羹欣有
鼎梅陳衝風搖海難銜石平隴開煙許負薪願得金甌名早貯敢
徯霖雨及波臣

月下陳令君剛長招飲敬亭山

女蘿睇笑自孤牽雲鳥何煩咏昔年藉有美人閒載酒更憐明月
皎如煙鐙青高閣遙鳴屨氣白羣峰靜侍絃夜久山禽響空翠清
機特爲此宵偏

空山碧月漾清暉觴咏難令此夕違共剪紅亭今夜燭一參黃蘗
再來機風中接葉聞猿嘯露次翻松悟鶴飛寧待留髭投去轄野
心礧礧自忘歸

黃蘗禪師爲令公鄉人

謝項司成水心招集古林菴

古林嘉木展晴暉
永日琴樽眷翠微
宛有宮鶯囀香樹
特分掌露漑閒薇
高談一破青山夢
緩酌聊攜碧月歸
久矣帝師推項橐
此中猿鶴欲何依

鷗夷幸托五湖船
高枕菰蘆懶問天
春艸薄吟桃葉雨
秋菱小摘莫愁煙
逃名尙畏漁樵著
息影甯逾薜荔賢
自哂鄭虔無一絕
煩君爲給杖頭錢

謝范司馬質公見訊

野心端合旅樵漁
自喜岑牟久遂初
陶令菊酣三逕酒
楊雲花覆一牀書
遺身祇覺青峯淺
息影猶嫌碧葉疎
艸犢且肥松鶴健
君恩元未薄居諸

烽塵莽莽此何時
方召推君定盍疑
大樹爭瞻杼虎略
枯槎聊可寄魚絲
月潭自爲鳴琴秀
雨圃難令種藥遲
爲報菖蒲樽已綠
銜杯何日醉江蘼

程司空我旋見枉賦此

山公物望著巖廊高閣琴書對隱囊直使公卿失榮膺遂爲頑懦
廣津梁新除特爲龍髯重夙譽高覘馬骨香自哂苔花冠已毀未
堪拂拭向王陽

用韻答薛比部諧孟

汗漫長懷若士行負春聊結五噫情陶彭澤酒碧無恙謝太傅山
青自橫野竹籜稀風細解池花烟破月初平與君澹枕松間石廣
武同嗤異代名

水亭吐月宛然秋彥集何殊名嶽遊艸聖爭傳青李帖芸香不散
白雲樓官閒鶴嶠賓長至句就雞林賈競求別後寧詩勝蘭芷一
時梧竹讓清幽

東董冀州里淳

五馬歸來物外身下帷還擬著天人閉門日與世情隔沽酒不嫌

生計貧土屋春閒朝飯犢布袍秋冷夜編鶉從君卜築青谿曲何
必花源學避秦

桑田滿目駭風波世事如君高枕何亂日加飡推麥飯野人努力
向漁簑幼安澤有豨堪牧廷尉門無雀可羅鳳去荒臺秋艸碧登
臨寧復忍悲歌

謝顧兔泉以其先人東橋公集見贈

芳隣結向杏花村衡宇相望似鹿門亂後始知魚麥貴閒來彌悟
雀羅尊琴書高士風無忝封禪先賢艸尙存近局隻雞招未遠與
君期不負山樽

晚坐弘濟寺

古柳參差掩寺門荆籬石埠自爲村風嚴烏榜通菱浦日落漁炊
就荻根野月荒荒難辨色江峰寂寂更何言鐙前無限浮沉思銷
在菰香水鶴喧

再遊栖霞柬恒覺上人

憶聽天開巖下鐘
苦吟清嘯對霜楓
別來幾碧山中艸
偶至還青雨後峯
大壑古雲仍抱石
空潭夙月又開松
振衣更指高霞路
落日將君辨海鴻

懷季重觀察江州解官還山陰

猿鶴稽山約未寒
羨君欣整遠遊冠
絲來聖世容招隱
安有才人不左官
老圃鍾長隨酒甕
中山篋豈至漁竿
懸知高枕層霞上
翻惻人間行路難

琵琶江月思紛紛
君與匡廬共一雲
蓮社偶來分虎笑
蘭亭長此狎鷺羣
亂來野菊難爲色
愁至霜楓易入聞
強起支牀舒遠眺
不堪秋艸載斜曛

曉過石馬沖

古原何地不桑麻
六代陵園問曙鴉
是處石麟銜晚照
幾聞笙鶴

馭高霞橫塘綠水漫菰葉平圃青藤胃豆花野犢不知離黍恨踏莎還上玉鈎斜

石言十二首

歲時薄有稼穡彌力秋穫屆期而無警聞矣

十畷年來夢已安農臣自許考槃寬祝雞晴柵秋煙迴捕蟹霜疇夜火寒竹篠謹應騰酒頌桑乾警不到漁竿何來蜂螢生懷袖空使顛毛豎鵲冠

春中聞流寇警予倡乞師議甚力里中亡賴謂無病呻吟當之茲潘將軍可大捐貲募士至而關變獨願以填

然則予義非與

南箕嗡嗡吠江城共懟侏儒浪請纓憎主爭爲羣盜袒罪言難謝始人情蚩尤朝避鈴門氣妖鳥宵嚴鐸帳聲到底安危馮此仗杞人何復負平生

賊野掠訛言四起兵使者王公憤之力於提師大練川擒馘疊奏賊僞而解合郡以安則吾鄉小人借外袞備

者去尋常攀臥情
行相越何重徑庭

江左夷吾藉鉅公小戎薄伐奏膚功符經秘篋分黃石劍氣中宵
射白虹身共荷戈零雨會手援失楫亂流中練川璧月明秋水不
與尋常借寇同

郡伯體悌君子且撫固其職疇曰非宜即賊殲後佯示
慰靜安反側也百爾芻蕘多所採納其用意蓋深乎深
矣遠矣

懷綏自是守臣心表餌何妨試綠林蔀屋已令書犢券桑間誰與
弄鶚音軍書莽莽秋雲苦官道離離萋楚深燧火車門宵未屏憐
予一顧短襦吟

宿令楊以清幹移攝桐未匝月賊厝火久颺發矣然
身處虎穴指授成擒雖其太夫人在宿署涕泣念之勿
顧也令何
負桐哉

令尹家風接四知三年冰譽滿松滋計當赤社移琴日久屬黃巾
定策時慈母啼烏淒月樹神君徙鱸著霜威至今三復鵠鴉什風

雨飄搖咽口碑

茲園乃家樵川公懸車處公憂時殫智慮不愛髮膚倍余而受驅裘之詬又同也黃鳥啄巢鳳德何衰是告曰歷吉日乎將行矣

茲園黃髮幸皤然憂杞恒居衆慮先尼父豈能違曠野靈均招與問高天鼎湖弓劍龍長臥故里荆榛鷺已遷艸色玄黃殊未已鴟夷莫負五湖船

賊渠黃文鼎注國華蓄亂久而迪奴張儒者適乘駿馬拜墳爲里兒所噬儒憾之遂輸貲注黃以佐鳴吠後其主誘縛之伏法與情殊快

鼠子胡然蓄異圖馮陵恥作霍家奴流言笑指青驄馬妖樹爭啼白項烏燐火不堪成異物穢形還惜點靈誅空餘爲蟻饑驅甚賴爾嗟來薦一鋪

桐中一時耆彥文儒表表月旦者薪木圖書爲賊所焚標幾盡相率避地白下而吳宮論客卿先生聞變遁跡于郊途不得大葬衣冠陽九一至于此

眞宰悠悠問莫申
幼安何適避風塵
長林未免衣冠禍
浚谷誰閒飲啄身
廢壘歸無王謝燕
羈栖行負叔敖薪
更憐太史修文日
梁木淒涼未敢陳

風雨舟行詣軍府陳賊狀不自知其初度也

江墅秋深菊未荒
幽香細雨遞危檣
紫萸樽爲離居罄
白石歌絲此夜長
荷屋衣裳元誨露
杞人容髻易臻霜
故園豺虎縱橫甚
弧矢羞聞射四方

弦高椎牛包胥抵蘭艸臣于父母邦心力竭矣不知我者謂我何求退而思遠遊豈予所欲哉

羈禽豈不戀喬柯
如此青山滿目何
避地若將違左袵
廻車何必異朝歌
四隅終自摧毛羽
千仞從今謝網羅
寄語籬邊衆雞鷺
好連爪距啄秋禾

醉尊人從下居白門如歌五噫出關也華陽地近得時叩鍊客丹方用代菽水洵是大樂

煙駕雲旗道益尊
飄然鶴髮共加飧
廚多粳糗充牛飯
地遠訾邪

即鹿門山賚有雲延屨杖萊衣何日不朝昏因嗤異代秦時叟雞犬蕭條寄古源

六朝清綺之遺寧采宛在舊典諸君子結有羣社茲得晨夕相訂清商玉樹尚可返于正始乎

六代菁華韻未荒絲來詞客此翱翔長干花滿青郊雨玄武荷綿綠水香敢謂浮槎關象緯漫思大雅易清商好沾孫楚樓中酒酌向高臺弔鳳皇

五言排律

壽龔直指瞻鳳太夫人八十四上韵

佳辰開鳳曆天寶煥龍光柏露凝華重芝雲攬秀長因駒歌渥水于鳥紀瑤筐卷耳懷空切松筠意不忘碩人儀特劭女史德維良蘭取充幃珮繁頻入釜湘和熊親誦讀卻鮮訓官方琢就家珪璧隆稱國棟梁甘棠榮旦月直木凜臺霜殿策能爭虎邊烽詎避狼遺身等飛藿固園若苞桑對壘援桴鼓登陣奮蹶張飡真窮穴鼠

虜亦畏神羊更歷虞廷狩重開禹貢荒包茅馳筆籥竹箭溢舩惶
驚鸛呼無癸貌貅氣孔揚遂廻天步險再見廟謨臧叱馭辭京室
乘輅肅帝鄉義聲蜚艸木仁聞洽飛翔周道援胥溺勤思戒復隍
澤先頽尾壑恩到白駒場望愈崇巖石勦看勒太常三江澄練淨
九子嶽蓮香華轡週南國中禴念北堂夢長依橘袖歸及捧莢觴
濟美蒸三秀弘文萃七襄麻姑停羽翮阿母授璈琅曲許雙成度
簫從弄玉颺西山呈日麗南浦獻雲祥此樂誠何極羣心若未央
膝前飄繡袞履下飾明璫曾借于游劍將鳴尙父璜感機杼黼黻
秉荻掃欃槍愷澤諸方豫忠謨聖主康普天歌大母良史撰幽芳
算與山河並麻將日月昌絲綸重賁閣袍笏且盈牀綵綈摩銅狄
蘭燈續玉肪龍門慙未陟鸞葦永相望願托長庚彩遙申北斗漿

題吳橋范氏祖德詩二十八韵

維恆鍾蟄德于岱割雄風電逐燕臺駿波翻北海虹山川旣蟠鬱

文物乃冲融，曄美成炎史。淹推奠夏功，餘靈難遽歇。華閔必終隆，
累葉開良治。彌天譽聖童，敬恭敦梓里。詞藻冠芹宮，侍學庭趨鯉。
爲儀陸漸鴻，經生容祭酒。哲匠讓宗工，取果寧嫌小。分荆不厭豐，
伊人誠隱豹。其夢亦維熊，萃聚英初拔。飛騰業早攻，名駒挺思曠。
毛鳳蔚超宗，艸聖門包鐵。琴心爨識桐，薦因名士挫。豕以腐毫崇，
巨彩收星漢。長天隱蟠螭，沉埋人似玉。損益道如弓，珠櫝光應燦。
璇源衍勿窮，崢嶸誇水部。磊落起山公，鱗向溟南運。羣能冀北空，
梅花官閣爛。桃李藥籠充，汗簡抽毫碧。泥書映軸紅，門蘭紛馥郁。
庭樹接青葱，仰久高山並。懷今片刺通，清言連曉夜。奇字扶鴻濛，
蹤跡五湖長。家聲萬石同，末繇瞻化鶴。聊爾竭雕蟲，彤管盈東壁。
賡歌正未終。

東瞿起田二十二韵

漢庭褒異績，周室宴嘉賓。四牡乘輶至，雙魚折柬頻。自慙旋豹尾，

未敢逆龍鱗病已同司馬耕將問子真庭萱長入夢篋艸久生塵
獨樹風驚鳥空牀月照人鄉書千里隔藥裏六時新顧腕疑多鬼
論心倍有神梧垣需劍履芝宇限城闌蕭寺經行寂空囊旅况貧
倒衣難命駕得句每書紳涕淚榆關事支離瓠落身喜峯虞勒馬
樂浪不爲臣揭揭徒看日滔滔莫問津杞憂虛慨慷桑土竟逡巡
廟算恒多闕封章肯厭陳松筠瞻勁節糠粃愧前薪紫寒餘蛇豕
青蒲獲鳳麟補天君煉石釣海我垂綸鷗狎清江渚鶯啼別墅春
蕘葭人倚玉芳樹月如銀白社依開士青山作逸民著書餘歲月
壤擊大江濱

夏日東池送友人納姬廣陵十二韵得僊字

嘉澣酬良月青門豫野泉池光開旭鏡林籟動薰絃枝綴投車果
香舒引步蓮稠星吟遂切簫月綵誰專鶴路行飛駕驪歌詎黯筵
偷分眉閣黛別卸御衣烟采藥難攜侶栽桃好趁年針樓蛛卻掛

銀渚鵲爭填梅樨羞承鼎花嬌不耐鈿吹移臺上史夢綰洞中僊
詞客傾奩咏王孫賤錦纏余懽參過末聊賦定情篇

五言絕句

園居雜咏

至人遺外事靈貺集霞上流鈴時有聲泠泠若松響十資閣

水淨頓無體素鮪如遊空瀕視見春鳥時翻藻荇中鏡舫

獨立步欄外空香何處來高枝颺絲蝶始悟木奴開香嶼

花葉循古情目玩自成綺莫惜倒山樽芳從此始綺雪亭

斟酌向邃古埋照無醒期爲憐竹林賢秋艸生蓬池酌古齋

拔爾荆榛叢立之琴書牖幽風曳女蘿向予若稽首石拜坪

平等菴偶成

泠泠曳蒼玉風庭不斷香馮崖眺寒碧或恐是滄浪

白雲自來去山情復何有胡然無盡時廡下羣峯首

童子施臺飯諸禽忽而懼爲適野人家枯樺看澆圃
夜靜松子落山鼠時一鳴空林殊寂寞賴此小蟲爭

煙客以水晶卮見貺繫以詩賦答

大冶結瑤冰善手劖寒玉綠蟻若浮空光氣自爲燭
撫菊引華卮因思貽者美報以玉壺心明蟾照秋水

七言絕句

釋稗十二首

江行偶閱稗官書輒咏其可喜者自娛

翠嬌折溜見盧魚天老擎拳拜綠書螭大如虹看莫笑炎皇珪女
有盈虛

蛤螺星聚寶光微拾得靈盆當壁歸不信禹餘糧坐竭池邊金鴈
莫教飛

雲陽谷口潦翻盆峭壁孤盤失晝暄却笑緼袍秋不暖甘泉聞說

有寒門

惠嫺湖邊灌木敷雞神來往在菰蒲猶嫌落葉污澄練青鳥遙銜
出島隅

溪上丹房草不蕪洪厓杖屨費招呼宜城春酒溶溶綠欲藉蘋香
酌鮑姑

雷塘無限白楊花寒食西風集暮鴉莫向舊堤窺柳色春鋤爭上
玉鈎斜

載燭行壇自委然青瓊遙望氣如仙桃戈試舉誰能刺薄向藍田
瘞寶煙

烟花賓從盛如雲別有嶽嶠刺史情歸去不乘淮海鶴單衫小馬
看盤伶

嵩高枕幙臥雲烟月戶遙分玉屑餐不是萬靈攢七寶望舒安得
勢如丸

高壇元狩禮星精東海真人果集靈榭葉蔽腰書滿把人間長誦
火珠經

曲江勝日剪花裝蜀錦流蘇引獸王不解繁華終逝水紅絲爭欲
絆春光

賓連萸萸繞堦生少海靈臺作頌成獨有金莖閉平露變龍何日
事韶頀

從眞州還金陵舟中無題

沙晴水碧浪花柔明月烟中度淺謳不是青衫絃上思依稀香語
囀西洲

秋蕪小直步痕深目遞無聲綠綺琴不羨桃花人面似願將絳葉
點雙心

瓊枝萎絕廣陵烟橋月無宵不可憐控鶴直追羸女駕簫聲定繞
鳳臺邊

清商玉樹已成塵
天女光音復度春
不識麗華能似不
雪霞一片藐姑身

文園消渴苦難蘇
悵望金莖澤並枯
自笑秋庭禪尚在
肯辭犢鼻腰當壚

湘蘭露重轉無芬
遮目猶嫌巫峽雲
千頃豔情關不着
蛾眉寸月一疑君

偶過長板橋感舊

秦淮何處饒寒色
長板荒橋霜艸多
惟有春風寄樊口
當筵能唱隔江歌

舟行無題四首

芹香艸碧柳花疎
雙燕雙飛掠水初
暮暮春潮弄明月
海枯何日到前魚

水調清歌何處郎
蘼蕪爭讓口脂香
自憐雙袖龍鍾甚
爲爾平裁

尺許強

不是從軍女木蘭佩間芳艸號宜男歡聲欲鬪前溪舞私向菱花試小慙

迴風舞雪壓春波不惜千巡醉叵羅酒後藏鈎殊意氣卻嘲桃葉是青娥

南海陳路若新婚甚驩調之

烏爪遙聞出綺疏城隅寧復費踟躕孟公更不投賓轄花葉長扶七寶車

增城沖舉有僊鬟君美重聞接珮環秦氏烏生八九子不須郎在鳳皇山

琴心曲曲豔人腸共臥牛衣秋夜長頰上粉痕銷不得紅潮何必醉檳榔

寂寂青谿笑小姑上山不唱采藤蕪辟纁生恐柔荑頓忍遣調漿

卓氏壚

詠懷堂詩

卷之四

二十七
益山
詩
會

YOUNG UNIVERSITY

MAY 15 1901

WILLIAMSON LIBRARY

詠懷堂詩集

卷四終





